

清

史

稿

清史稿

志

選舉四

制科

薦擢

制科者天子親詔以待異等之才唐宋設科最多視爲優選清代科目取士垂爲定制其特詔舉行者曰博學鴻詞科經濟特科孝廉方正科若經學若巡幸召試雖未設科可附見也聖祖敦崇實學康熙甲辰丁未兩科改試策論旣廷臣以古學不可猝辦請仍舊制十七年詔曰自古一代之興必有博學鴻儒備顧問著作之選我朝定鼎以來崇儒重道培養人才四海之廣豈無奇才碩彥學問淵通文藻瑰麗追蹤前哲者凡有學行兼優文詞卓越之人不論已仕未仕在京三品以上及科道官在外督撫布按各舉所知朕親試錄用其內外各官果有眞知灼見在內開送吏部在外開報督撫代爲題薦嗣膺薦人員至京詔戶部月給廩餼明年三月召試體仁閣凡百四十三人賜燕試賦一詩一帝親覽試卷取一等彭孫適倪燦張烈汪穉喬萊王頊齡李因萬秦松齡周清原

陳維崧徐嘉炎陸柔馮昂錢中諧汪楫袁佑朱彝尊湯斌汪琬邱象隨等二十
人二等李來泰潘耒沈珩施閔章米漢雯黃與堅李鎰徐欽沈筠周慶曾尤侗
范必英崔如岳張鴻烈方象瑛李澄中吳元龍龐塏毛奇齡錢金甫吳任臣陳
鴻績曹宜溥毛升芳曹禾黎養高詠龍燮邵吳遠嚴繩孫等三十人三四等俱
報罷命閣臣取前代制科舊事查議授職尋議兩漢授無常職晉上第授尙書
郎唐制策高等特授尊官次等予出身因有及第出身之目宋分五等一二等
皆不次擢用三等爲上等恩數視廷試第一人四等爲中等視廷試第三人皆
賜制科出身五等爲下等賜進士出身得旨俱授爲翰林官以光祿少卿邵吳
遠爲侍讀道員郎中湯斌等四人爲侍講進士出身之主事中行評博內閣典
籍知縣及未仕之進士彭孫遜等十八人爲編修舉貢出身之推知教職革職
之檢討知縣及未仕之舉貢臈監布衣倪燦等二十七人爲檢討俱入史館纂
修明史時富平李因薦長洲馮秀水朱彝尊吳江潘耒無錫嚴繩孫皆以布
衣入選海內榮之其年老未與試之杜越傅山王方穀等文學素著俱授內閣

中書許回籍雍正十一年詔曰博學鴻詞之科所以待卓越淹通之士康熙十七年特詔薦舉召試授職得人極盛數十年來未嘗廣爲拔羅朕延攬維殷宜有枕經薛史殫見洽聞足稱鴻博之選者當特修曠典嘉予旁求在京滿漢三品以上在外督撫學政悉心體訪保題送部朕臨軒親試優加錄用詔書初下中外大吏以事關曠典相顧遲回逾年僅河東督臣舉一人直隸督臣舉二人他省未有應者詔責諸臣親望高宗卽位再詔督促期以一年內齊集闕下先至者月給廩餼乾隆元年御史吳元安言薦舉博學鴻詞原期得湛深經術敦崇實學之儒詩賦雖取兼長經史尤爲根柢若徒研綴儷偶推敲聲律縱有文藻可觀終覺名實未稱下吏部議定爲兩場賦詩外增試論策九月召試百七十六人於保和殿賜燕如例試題首場賦詩論各一二場制策二取一等五人劉綸潘安禮諸錦于振杭世駿等授編修二十人陳兆崙劉藻夏之蒼周長發程恂等授檢討楊度汪沈廷芳汪士鋐陳士瑤齊召南等授庶吉士二年補試體仁閣首場制策二二場賦詩論各一取一等萬松齡授檢討二等張漢授

檢討朱荃洪世澤授庶吉士自康乾兩朝再舉詞科與其選者山林隱逸之數多於縉紳右文之盛前古罕聞時承平累葉海內士夫多致力根柢之學天子又振拔淹滯以示風勵爰有保薦經學之制乾隆十四年詔曰崇尚經術有關世道人心今海宇昇平學士大夫精研本業窮年矻矻宗仰儒先者當不乏人大學士九卿督撫其公舉所知不限進士舉人諸生及退休閒廢人員能潛心經學者慎選毋濫尋中外疏薦者四十餘人帝爲防倖進下廷臣覆覈得陳祖范吳鼎梁錫瑛顧棟高四人命呈覽著述派翰林中書官在武英殿各繕一部尋授鼎錫瑛國子監司業召對勤政殿祖范棟高以年老不能供職俱授司業銜後不復舉行至屬車臨幸宏獎士林康熙四十二年四十四年聖祖巡幸江浙召試士子中選者賜白金赴京錄用有差高宗六幸江浙三幸山東四幸天津凡士子進獻詩賦者召試行在優等予出身授內閣中書次者賜束帛仁宗東巡津淀西幸五臺召試之典亦如前例道光以後科舉偏重時文沿習既久庸濫浮寔僞失精意三十年候補京堂張錫庚請復開博學鴻詞科以儲人才

禮部議以非當務之急遂止洎光緒中葉外侮孔棘海內皇皇昌言變法二十四年貴州學政殿修請設經濟特科下總理各國事務衙門會禮部嚴議八月慈禧皇太后臨朝訓政以經濟特科易滋流弊罷之庚子京師構亂乘輿播遷兩宮怵於時局跼危亟思破格求才以資治理二十七年皇太后詔舉經濟特科命各部院堂官及各省督撫學政保薦有志慮忠純規模闊遠學問淹通洞達中外時務者悉心延攬並下政務大臣擬定考試事宜御史陳秉崧奏請力除夤緣積習詔飭諸臣務矢至公既三品以下京卿紛紛保送帝覺其尤濫適太僕少卿隆恩薦疏上竟報寢並命撤銷太常少卿李擢英前保諸人二十九年政務處議定考試之制如廷試例於保和殿天子親策之凡試二日首場入選者始許應覆試均試論一策一簡大臣考校取一等袁家穀張一慶方履中陶炯照徐沅胡玉緒秦錫鎮俞陸雲袁勵準等九人二等馮善徵羅良鑑秦樹聲魏家驊吳鍾善錢鏗蕭應椿梁煥奎蔡寶善張孝謙端緒麥鴻鈞許岳鍾張通謨楊道霖張祖廉吳烈陳曾壽等十八人迨授官命下京職外任僅就原階

略予陞叙舉貢用知縣州佐以視康乾時詞科恩遇寔不如矣三十四年御史俾壽請特開制科政務處大臣議以孝廉方正直言極諫兩科皆無實際惟博學鴻詞科康熙乾隆間兩次舉行得人稱盛際茲文學漸微保存國粹實爲今日急務應下學部籌議時方詔各省徵詔耆儒碩彥湖南舉人王闓運被薦授翰林檢討兩江安徽相繼薦舉王耕心孫葆田程朝儀吳傳綺姚永樸姚永概馮敦等部議以諸人覃研經史合於詞科之選俟章程議定陳請舉行未幾德宗崩遂寢孝廉方正科始於康熙六十一年世宗登極詔直省府州縣衛各舉孝廉方正賜六品章服備召用雍正元年詔曰國家敦勸風俗首重賢良前詔舉孝廉方正距今數月未有疏聞恐有司怠於採訪雖有端方之品無山上達各督撫速遵前詔確訪舉奏尋浙江直隸福建廣西各薦舉二員用知縣年五十五以上者用知州其後歷朝御極皆恩詔薦舉以爲常乾隆元年刑部侍郎勵宗萬言孝廉方正之舉稍有冒濫卽有屈抑從前選舉各官鮮克公當非鄉井有力之富豪卽宮牆有名之學竊迨服官後庸者或以劣黜黠者或以賤敗

請慎選舉以重名器吏部議准府州縣衛保舉孝廉方正應由地方紳士里黨合辭公舉州縣官採訪公評詳稽事實所舉或係生員會學官考覈申送大吏覈實具題給六品章服榮身果有德行才識兼優者督撫逾格保薦赴部九卿翰詹科道公同驗看候旨擢用濫舉者罪之五年定考試例除樸實拘謹無他技能不能應試者例子頂戴不送部外其膺薦赴部者驗看後試以時務策殿奏各一於太和殿門內道光間改於保和殿如考試御史例同治初元明詔選舉又以知縣黎庶昌條陳諭令在京四品以上在外督撫學政各舉所知不限紳士布衣以躬行實踐爲先毋得專取文詞藻麗者濫膺盛典其有年登耄蚤或誠樸無華足爲里閭矜式不願來京者州縣官歲時存問賜以酒米光緒六年定自恩詔日起予限八年人文到部每年二月八月各會驗奏考一次逾限者止許章服榮身不得與考初制授官用知州知縣厥後薦舉人衆乃推廣用途分別以知縣直隸州州同州判佐雜等官及教職用知縣得缺視拔貢教職視大挑二等舉人餘均分省試用序補歷朝以來有司奉行第應故事徇情冒

濫之弊竇諫屢以上聞惟嘉慶朝湖南嚴如煜以對策第一召見授知縣咸豐朝湖南羅澤南以書生率湘勇越境勦賊皆以勳績見稱於時宣統初各省所舉多至百數十人少亦數十人詔飭嚴行甄拔選舉之風於斯濫矣

清代科目取士外或徵之遺佚或擢之廉能或舉之文學或拔之戎行或辟之幕職薦擢一途得人稱盛有足述焉太祖肇興東土選拔英豪以輔大業委輅杖策之士咸與擢用或招直文館或留預帷幄乙卯十一月諭羣臣曰國務殷繁必得賢才衆多量能授職勇能攻戰者宜治軍才優經濟者宜理國博通典故者宜諮得失嫻習儀文者宜襄典禮富隨地旁求俾列庶位時削平諸國設八旗制需才亟太宗卽位首任儒臣范文程領樞密重事天聰八年甲喇章京朱繼文子延慶上書言我朝攻城破敵斬將奪旗者不乏人守境治民安內攘外者未多見因疏舉漢人陳極新刑部啓心部申朝紀足備任使帝召延慶等御前溫諭褒獎命延慶極新文館錄用朝紀仍任部事九年諭滿漢蒙古各官薦舉人才不限已仕未仕牒送吏禮二部具名以聞直文館甯完我言古者薦

舉之條功罪連坐所以杜弊端防冒濫請自後所舉之人或功或罪舉者同之若其人砥行於厥初改節於末路許舉者隨時檢舉免連坐帝嘉納焉世祖定鼎中原順治初元遣官徵訪遺賢車輅絡繹吏部詳察履歷確數才品促令來京並行撫按境內隱逸賢良逐一啓薦以憑徵擢順天巡撫宋權陳治平三策首廣羅賢才以佐上理並薦故明薊遼總督王永吉等詔廷臣各舉所知一時明季故臣如謝陞馮銓黨崇雅等紛紛擢用中外臣工啓薦除授得官者不可勝數嗣以廷臣所舉類多明季舊吏廢員未有肥遯隱逸逃名之士詔自今嚴責舉主得人者優加進賢之賞外謬者嚴行連坐之罰薦章止以履歷上聞才品所宜聽朝廷裁奪儻以貲耶雜流及黜革青衿投閒武弁妄充隱逸咎有所歸若畏避連坐緘默不舉治以蔽賢罪二年陝西江南平詔徵山林隱逸並故明文武進士舉人山東巡撫李之奇以保薦濫及貲耶詔旨切責十三年江南巡撫張中元薦故明進士陸貽吉于泚帝親試之是年復詔各省舉奏地方人才給事中梁鏡言皇上寤寐求才詔舉山林隱逸應聘之士自不乏人然采訪

未確有負盛舉如江南舉呂陽授監司未幾以贓敗山東舉王運熙授科員未
有建明以計典去呂陽等豈真抱匡濟之才不過爲梯榮之藉耳山林者何謂
遠於朝市也隱逸者何謂異於趨競也必得其人乃當其位請飭詳加采訪疏
入報聞順康間海內大師宿儒以名節相高或廷臣交章論薦弼吏備禮敦促
堅臥不起如孫奇逢李顥黃宗羲輩天子知不可致爲歎息不置僅命督撫抄
錄著書送京師康熙九年孝康皇后升祔禮成頒詔天下命有司舉才品優長
山林隱逸之士自後歷朝推恩之典雖如例行實應者寡初制督撫陞遷離任
時薦舉人才一次嗣令歲一薦舉部議大省限十人小省限三四人後復改二
年薦舉一次自順治十八年停差巡按乃定各省巡撫應舉方面有司佐貳教
官員額總漕總河應薦方面有司佐貳額亦著爲例康熙二年御史張吉午奏
三年考滿之法一二等稱職者卽係薦舉請罷督撫二年薦舉例從之六年停
考滿用給事中李宗孔言復薦舉與卓異並行先是清河薦舉例停十二年漕
督帥顏保請復舊例每年得舉劾屬吏示勸懲部議行因疏薦糧道范周遲日

吳知縣吳興祚詔擢興祚福建按察使聖祖親政銳意整飭吏治屢詔羣臣薦舉天下廉能官十八年左都御史魏象樞疏薦清廉原任侍郎高珩達哈塔雷虎班迪大理卿瑚密色侍讀蕭維豫郎中宋文運布政使畢振姬知縣張沐陸隨其等十人得旨分別錄用並諭陸隨其廉能之員宜任繁劇如直隸清苑江蘇無錫等縣庶可表見其才十九年福建巡撫吳興祚薦按察使于成龍天下廉能第一遷布政使尋擢直隸巡撫二十年入覲帝溫諭褒美問屬吏中亦有清廉者否成龍以知縣謝錫袞同知何如玉羅京對未幾調成龍兩江總督潞行疏薦直隸守道董秉忠通州知州于成龍南路通判陳大棟柏鄉知縣邵嗣堯阜城知縣王燮高陽知縣孫宏業霸州州判衛濟賢並堪大用會江寧知府闕詔卽以通州知州于成龍擢補不數年擢直隸巡撫同時兩于成龍先後汲引並以清操特邀帝眷時論稱之二十三年諭部臣保舉應補剛差僉以有才及謹慎者不乏人而操守實難知對帝曰清操如何可廢如郝浴居官甚好猶侵蝕錢糧魏象樞曾薦郝浴此事安能豫知朕信部院堂官清操而委任之堂

官亦信司官而委任之但將有守之人舉出被舉者自能効力是年九卿詹事科道遵旨疏舉清廉直隸巡撫格爾古德吏部郎中蘇赫范承勳江南學道趙崙揚州知府崔華兗州知府張颺翮靈壽知縣陸隴其等二十六年帝嘉直隸巡撫于成龍清廉命九卿各舉廉吏如成龍者大學士等薦雲貴總督范承勳山西巡撫馬齊四川巡撫姚緜虞帝謂承勳等居官皆優但尙有勉強之意成龍則出自誠心毫無瞻顧命加成龍太子少保銜以勸廉能四十年敕總督郭琇張颺翮桑額華顯巡撫彭颺李光地徐潮薦道府以下知縣以上清廉愛民者勿計罪誤降罰勿拘本省隣屬具以名聞時天子廣厲風節羣士慕效吏治丕變循吏被萬膺顯擢者先後踵相接先是廷臣曾推廣西按察使缺吏部侍郎胡簡敬淮安人以推舉淮陽道高成美違例獲譴至是申禁九卿毋得保舉同鄉及本省官復限每人歲舉毋逾十人五十三年尙書趙申喬舉潮州知府張應詔能耐清貧可爲兩淮運使帝曰清官不係貧富張伯行家道甚饒任所日用皆取諸其家以爲不清可乎一心爲國卽好官或操守雖清不能辦事亦

何裨於國六十一年世宗嗣位諭曰知人則哲自古爲難朕臨御之初簡用人
才或品行端方或操守清廉或才具敏練諸大臣密奏所知勿避嫌徇私沽名
市恩有負諮詢又以道府州縣親民要職敕總督舉三員巡撫舉二員布按各
舉一員將軍提督亦得舉一員密封奏聞四年以各省所舉未能稱旨詔切責
之令各明舉一人不得雷同同時薦賢詔屢下帝綜覈名實賞罰必行七年以督
撫布按爲全省表率命京官學士侍郎以上外官藩臬以上各密保一人不拘
滿漢不限資格卽府縣中有信其可任封疆大僚亦許列薦刻高宗重視親民
之官乾隆二年諭仿雍正時例督撫布按各密舉一二人次年復命大學士九
卿舉堪任道府人員踰章啓奏八年詔大學士舉編檢能任知府者十四年命
侍郎以上舉能任三品京堂者尙書以上舉能任侍郎者其時明揚密保並行
不廢科道行取自康熙七年復舊制詔督撫舉親民之官賢能夙著者親加選
用二十九年詔九卿各舉所知尙書王隲舉清苑知縣邵嗣堯李天馥舉三河
知縣彭應靈壽知縣陸隴其徐元文學麻城知縣趙蒼璧及廷推時帝復問都

御史陳廷敬廉者爲誰廷敬亦以隴其嗣堯天下清官爲言時同舉十二人俱用科道得人爲最乾隆四吏部奏請行取高宗命尙書都御史侍郎於各部屬州縣內秉公保舉如康熙二十九年例次年諭聖祖時如湯斌陸隴其學問純正言行相符陳瓚彭鵬操守清廉治行卓越天下之大人材之衆豈無與數人頡頏者大學士九卿其公舉備采擇七年帝思骨鯁質樸之士如古馬周陽城起布衣爲御史者詔大學士九卿及督撫勿論資格列名舉奏嗣諸臣奏到下吏部定期考試明年二月考選御史試以時務策帝親取中書胡寶瑔第一引見寶瑔涂逢震等十人用御史沈瀾發江南補用旣而從御史李清芳奏選用御史令吏部將合例人員奏請考試於是保薦御史例罷清代未設直言極諫之科而選擇言官至爲慎重裨益政治非淺鮮也自康乾兩朝尙質學一時名儒碩彥膺薦擢者尤難悉數康熙十七年聖祖問閣臣在廷中博學能詩文者孰爲最李燾馮溥陳廷敬張英交口薦戶部郎中王士禛召對懋勤殿賦詩稱旨授翰林院侍講部曹改詞臣自士禛始三十三年詔大學士舉長於文學

者王熙張玉書疏薦在籍尙書徐乾學左都御史王鴻緒少詹事高士奇召來京修書乾學未聞命卒詔進呈遺書並召其弟秉義來京四十五年大學士李光地薦直隸生員王闈生入直內廷尋賜舉人進士授編修游躋卿貳歷康熙乾隆三朝凡天祿秘書廢不與校勘之役同時江南何焯亦以寒儒賜舉人進士直南書房授編修被劾解官仍直書局亦光地薦也雍正中侍郎兼祭酒孫嘉淦薦舉人雷鉞學行爲國子監學正乾隆初尙書管監事楊名時薦進士莊亨陽舉人潘永季蔡德峻秦蕙川吳鼎貢生官獻瑤王文震監生夏宗瀾等潛心經學並爲國子監屬官三十八年詔開四庫館延置儒臣以翰林官纂輯不敷大學士劉統勳薦進士邵晉涵周永年尙書裘曰修薦進士余集舉人戴震尙書王際華薦舉人楊昌霖同典秘籍後皆改入翰林時稱五徵君此其著者也嘉慶初和坤敗仁宗下詔求賢諭滿漢大臣密舉操守端潔才猷幹濟居官事蹟可據者降敕褒擢廉史劉清風厲天下十九年御史卓秉恬請嚴禁濫保帝是之宣宗卽位尙書劉鏞之薦起名儒唐鑑授廣西知府四川總督蔣攸銛薦

川東道陶澍治行第一擢按察使澍好臧否人物開藩院中入覲論奏侃侃多所舉劾宣宗疑之密諭巡撫孫爾準察其爲人爾準條列善政密疏保薦遂獲大用擢兩江總督臨歿遺疏薦粵督林則徐繼己任澍以知人稱咸同中興諸名臣多爲所識拔文宗嗣位詔求直言侍郎曾國藩疏陳本原至計尤在用人人材有轉移之道培養之方考察之法帝嘉納之詔中外大臣薦舉人才大學士穆彰阿奏保宗室文彩折溲特旨用京堂大學士潘世恩疏薦前總督林則徐按察使姚瑩員外郎邵懿辰中允馮桂芬尙書杜受口首薦則徐及前漕督周天爵詔起則徐薦師天爵巡撫廣西侍郎曾國藩薦太常少卿李棠階郎中吳廷棟通政副使王慶雲江蘇淮揚道嚴正基浙江知縣江忠源尙書周祖培亦薦棠階廷棟及郎中易棠等多蒙擢用雲貴總督吳文鎔貴州巡撫喬用遷薦知府胡林翼擢道員咸豐五年以各省用兵詔采訪才兼文武膽識出衆之士御史宗稷辰疏薦湖南左宗棠浙江姚承輿江蘇周騰虎管晏廣西唐啓華命各督撫訪察送京引見是時海內多故粵寇縱橫文慶以大學士直樞廷屢

密請破除滿漢畛域用人不拘資地謂漢人來自田間知民疾苦熟諳情僞辦賊當重用漢人國藩起鄉兵擊賊戰失利謗議紛起文慶獨謂國藩忠誠負時望終當建非常功宜專任討賊又嘗奇林翼才略林翼以貴州道員留楚帶勇勦賊國藩薦其才堪大用勝己十倍一歲間擢湖北巡撫文慶實中主之袁甲三督師淮上略乘章巡撫湖南文慶薦其才請勿他調以觀厥成時論稱之七年林翼奏陞國處士萬斛泉及其弟子宋鼎郁金粟砥礪廉隅不求仕進請予獎勵詔賞斛泉等七品冠服有差時軍事方殷迭飭疆吏及各路統兵大臣奏舉將才林翼舉左宗棠子四品京堂襄辦國藩軍務沈葆楨劉蓉張運蘭命國藩林翼調遣他如塔齊布羅澤南李續賓李續宜彭玉麟楊岳斌等俱以未弁或諸生拔自戎行聲績爛然曾胡知人善任薦賢滿天下卒奏中興之功穆宗踐阼以軍興後吏治廢弛特擢天津知府石贊清爲順天府尹諭各省訪察循良有伏處山林德行醇備學問淵通之士督撫學政據實奏聞尋國藩疏稱常州士民尙節義城陷與賊相持其士子多藏書稽古如候選同知劉翰清監生

趙烈文方駿謨華蘅芳從九品徐壽等若使閱歷戎行廓其聞見有神軍謀詔譚廷襄嚴澍森左宗棠薛煥訪求遣送國藩軍營錄用同治元年諭廷臣曰上年屢降旨令保舉人才各督撫已將政績卓著人員登諸薦牘在京如大學士周祖培大學士銜祁寯藻翁心存協辦大學士倭仁侍郎宋晉王茂蔭科道高延祐薛春藜郭祥瑞等各有薦舉人臣以人事君不必俟有明詔始可數陳其各臚列事實秉公保奏復屢諭國藩保薦督撫大員國藩言封疆將帥惟天子舉措之四方多故疆臣既有征伐之權不當更分黜陟之柄宜防外重內輕之漸兼杜植私樹黨之端帝優詔褒答二年河南學政景其潯奏副貢生蘇源生等學行授本省訓導命各學臣訪舉經明行修之士酌保數人不爲恒制九年浙江學政徐樹銘以采訪儒修疏薦已革編修俞樾請賞還原銜送部引見秀水教諭譚廷獻舉人趙銘江西拔貢楊希閔等比照召試博學鴻詞例子廷試帝以樹銘私心自用下部嚴議錮四級此因薦舉獲譴乃其變也光緒七年兩督臣張樹聲撫臣裕寬薦在籍紳士山西襄陵知縣南海進士朱次琦國子監

典籍銜番禺舉人陳澧篤行詔予五品卿銜以勸績學十年以外覈迭啓時事日懇諭大學士六部九卿直省將軍督撫無論文武兩途有體用賅備謀勇俱優或諳習吏治兵事熟悉中外交涉或善製船械精通算術或饒有機智驍勇善戰或諳諫水師及沿海情形者廣爲訪求具實陳奏二十一年訪求奇才異能精天文地輿算法格致製造學者二十四年翰林院侍讀學士徐致靖疏薦工部主事康有爲刑部主事張元濟湖南鹽法長寶道黃遵憲江蘇知府譚嗣同廣東舉人梁啓超特予召見徵遵憲嗣同至京賞啓超六品銜任譯書局事時德宗親政激於外勢亟圖自彊詔求通達時務人才中外紛紛薦舉而草茅新進之臣刻勵求新昌言變法矣未幾黨禍起慈禧皇太后訓政有爲竄海外其弟廣仁及御史楊深秀軍機章京譚嗣同林旭楊銳劉光第棄市致靖以黨附下獄禁錮復追論原保諸臣罪御史宋伯魯湖南巡撫陳寶箴開缺戶部尙書協辦大學士翁同龢俱削官永不叙用禮部尙書李端棻謫戍邊內閣學士張百熙下部議處其他言新政者斥逐殆盡迨庚子京師遭亂越年和議成兩

宮西幸廻鑾時事日棘三十三年詔中外大臣訪求人才不拘官階大小有無官職確知才堪大用及擅專長者切實薦舉派王大臣察驗詢問出具考語召見於時被薦人員分起赴京除官錄用者至宣統間猶未已然自光緒之季改訂官制增衙署置官缺破格錄用人員輒以千數薦擢亦太濫矣宣統元年御史謝遠涵言變法至今長官但舉故舊士夫不諱鑽營請嚴定章程以貪劣聞者反坐舊主加以懲處疏下所司而已薦舉不拘流品清代才臣以佐雜游跡開府者如雍正間之李衛田文鏡乾隆間之楊景素李世傑政績最著厥後捐納日廣起家雜流庸庸擢者無算其人大都饒有幹局以視科目循資遷轉以資格坐致高位蓋不作也薦舉之尤異者康熙初陝西提督王進寶薦其子用子材武可勝副將後以功擢總兵父子同建節鉞雍正間雲南總兵趙坤擢貴州提督請以其子秉鐸爲貴州提標參將帝允所請孫嘉淦爲祭酒舉其弟揚淦爲國子監學正湖南衡永郴桂道汪樹且薦其父原任刑部司官溲學問優裕政事練達授四川知府此則舉不避親其破除成例又如此徵辟幕僚雍正

元年詔吏部嗣後督撫所延幕賓將姓名具奏稱職者題部議叙授之職位以示砥礪乾隆元年侍郎吳應棻以鼓勵賢才請立勸懲之法洎道光間幕友濫邀甄叙彙諫屢以爲言詔督撫鹽政一切議叙不許保列幕友並嚴禁本省屬員濫充違者吏部查參議處康熙時布衣陳潢佐靳輔治河特賜僉事道銜雍正時方觀承爲定邊大將軍平郡王記室以布衣召見賜中書銜乾嘉間名臣如王杰嚴如煜林則徐輩皆先佐幕而後通籍追咸同軍興左宗棠李鴻章劉峇等多以幕僚佐績戎旂成中興之業曾國藩總制軍務幕府號多才實從極一時人選尤卓卓可紀者也

清史稿

志

選舉五

封贈

推選

封贈之制文職隸吏部八旗綠營武職隸兵部順治間單恩及三年考滿均給封贈康熙初廢文武職考滿封贈文職封贈之階初正一品特進光祿大夫尋改光祿大夫從一品光祿大夫後改榮祿大夫正二品資政大夫從二品通奉大夫正三品通議大夫從三品中議大夫正四品中憲大夫從四品朝議大夫正五品奉政大夫從五品奉直大夫正六品承德郎從六品儒林郎吏員出身者宣德郎正七品文林郎吏員出身者宣議郎從七品徵仕郎正八品修職郎從八品修職佐郎正九品登仕郎從九品登仕佐郎武職封贈之階初分三系一曰滿漢公侯伯封光祿大夫後改建威將軍二曰八旗一品光祿大夫二品資政大夫三品通議大夫四品中憲大夫五品奉政大夫六品承德郎後改武信郎七品文林郎後改舊武郎八品修職郎九品登仕郎乾隆三十二年改同

綠旗三曰綠旗營封贈官階屢變初制正從一品榮祿大夫正二品驃騎將軍從二品驍騎將軍正三品昭勇將軍從三品懷遠將軍正四品明威將軍從四品宣武將軍正五品武德將軍從五品武略將軍正六品昭信校尉從六品忠顯校尉後增正七品奮勇校尉乾隆二十年改正二品武顯大夫從二品武功大夫正三品武義大夫從三品武翊大夫正四品昭武大夫從四品宣武大夫正五品武德郎從五品武略郎正六品武信郎從六品武信佐郎正七品奮武郎三十二年改正一品建威大夫從一品振威大夫增從七品奮武佐郎正八品修武郎從八品修武佐郎八旗與綠營制度始畫一五十一年改正一品建威將軍從一品振威將軍正二品武功將軍從二品武義都尉從三品武翊都尉正四品昭武都尉從四品昭武都尉正五品武德騎尉從五品武德佐騎尉正六品武略騎尉從六品武略佐騎尉正七品武信騎尉從七品武信佐騎尉正八品奮武校尉從八品奮武佐校尉增正九品修武校尉從九品修武佐校尉於是文武官階等級相伴矣文武正從一品妻封一品夫

人滿漢公妻爲公妻一品夫人侯妻爲侯妻一品夫人伯妻爲伯妻一品夫人
正從二品夫人正從三品淑人正從四品恭人正從五品宜人正從六品安人
正從七品孺人正從八品八品孺人正從九品九品孺人武職八旗八品以下
綠旗營七品以下妻無封後改綠旗營正七品妻封孺人順治五年定制凡遇
恩詔一品封贈三代誥命四軸二三品封贈二代誥命三軸四五品封贈一代
誥命二軸六七品封贈一代勅命二軸八九品止封本身勅命一軸凡軸端一
品用玉二品用犀三四品用裏金五品以下用角凡推封之例順治初制父祖
現任者不得受子孫封致仕及已故者許給願棄職就封者聽兩子均仕其父
母受封從其品大者婦人因子封贈而夫與子兩有官亦從其品大者父官高
於子者嫡母從父官生母從子官爲人後者已封贈祖父母父母請以本身妻
室封典嫡封本生祖父母父母者許嫡封康熙五年定父職高於子者依父原
品封贈官卑於子者從子官封贈武職子見任文職封贈依文官例雍正三年
定四品至七品官願將本身妻室封典嫡封祖父母者八九品官願嫡封父母

者皆許她封三品以上她封曾祖父母者請旨定奪乾隆間折中禮制頗有更定二十七年諭曰子孫官品不及祖父之崇則父爲大夫子爲士記有明文舊例依祖父原階封贈殊未允協其議改之吏部議定文武官子孫職大祖父職小依子孫官階封贈祖父職大子孫職小不得依祖父原品封贈父官高於子者生母從子官封贈嫡母繼母不得依父官請封願依子官受封者聽武職子任文職者亦如之五十年定一品至三品官不得她封高祖父母四品至七品官不得她封曾祖父母八品官以下不得她封祖父母道光以後捐封例開二十三年許三品以上官欲捐請本生曾祖父母封贈者得依她封曾祖父母例報捐二十八年許四品至七品官捐請她封曾祖父母八品官以下捐請她封祖父母均依常例加倍報捐而限制始廢矣舊例八九品官許封父母不封本身妻室應封妻者止封正妻一人正妻未封已歿繼室當封者正妻亦得追贈其再繼者不得給封道光二十三年許八品以下捐封人員欲捐請及妻室者加倍報捐咸豐二年許京外文職及捐職人員得先封本身及原配繼配妻室

再依本身品級爲第三繼妻捐封四年並從部議第三繼妻以後誼同敵體亦許依次遞捐矣舊例仕宦至三品幼爲外祖父母撫養其外祖父母歿無嗣者許依其官階贈其餘外姻不許贈封道光二十三年許捐封人員爲其受恩撫養之母舅舅母姑夫姑母姨夫姨母妻父妻母依祖封外祖父母例捐請贈封咸豐三年並許贈封曾祖父母伯叔祖父母伯叔父母庶母兄嫂並嫡堂伯叔祖父母嫡堂伯叔父母嫡堂兄嫂從堂再從堂尊長及外曾祖父母外祖父母妻祖父母按例定品級一體捐請又許爲人婦者爲其已故夫之祖若父捐職請封爲人後者爲祖若父贈封其先人展轉推衍而經制蕩然矣加級請封之制其初限制亦嚴順治初凡恩詔加級者以新加之級給封康熙五十二年定例七品以下加級請封不得逾五品五六品不得逾四品三四品不得逾二品捐級不得計算乾隆間外官加級不論新舊不得依加級請封五十年部議京官八品以下得依加級請五品封不惟逾分亦覺太優嗣後八品以下不得逾七品在外未入流不得給封願捐納榮親者許其捐封從之嘉慶後限制漸

寬京外官恭遇覃恩許報捐新級請封讓叙三四品職銜人員加級捐請二品封典許加倍納銀按現任及候補候選例給封咸豐初推廣捐例京外各官及捐職人員由加級及捐加之級捐封者現任及候補候選三四品官許捐至二品其五六品加等捐請三品封者依常例加倍報捐加等捐請至二品者依四品職銜得捐二品封例加倍半報捐其七品加等捐請三四品封八品以下加等捐請五六品封均依常例分別加倍報捐十年定二品人員加級捐封按一品人員銀數加倍許給從一品封二三品虛銜人員捐從一品封應按二三品實職銀數加成或加倍報捐其有爲外姻捐從一品封者許各按二三品實職虛銜銀數再行分別加成報捐陵夷至光緒中御史李慈銘疏曰治國之要惟賞與罰罰固不可稍踰賞亦豈可或濫康熙乾隆兩朝享國久長慶典武功縷指難盡其時內外臣工屢逢恩詔論功行賞班序秩然未有越等者今則外官道員多至二品其封皆至一品矣知府同知多加三品其封皆至二品矣牧令大半四品簿尉大半五六品其封率至三四品矣夫爵賞者人君所以進退賢

愚人臣所以奔走吏士得之太易則人不知恩予之太驟則士無由勸尊卑不別等級不明長僂士之浮囂惑小民之觀聽非所以尊朝廷清流品也奏上亦未殺減厥後外患頻仍人才缺乏二十六年詔停報捐實官而盧銜封典報捐如故宣統元年吏部議定條例京官依加級外官依本任請封願欲規復舊制格不得行明年改定京官依加級外官依加銜五品人員許請至三品封贈八員人員許請至六品封贈欲稍事補救而積重難返矣廕敘之制曰恩廕曰難廕曰特恩廕始順治十八年恩詔滿漢文官在京四品在外三品以上武官在京在外二品以上各送一子入監護軍統領副都統阿思哈尼哈番侍郎學士以上之子爲廕生餘爲監生初制公侯伯子一品廕子男分別授廕雍正二年改世職俱依三品予廕乾隆三十四年定公侯伯依一品子依二品男依三品子廕雍正初定例廕生廕監生通達文義者交吏部分各部院試驗行走其十五歲以上送監讀書者年滿學成咨部奏聞分部院學習又令文武廕監生通達文理者遵例考試以文職錄用其幼習武藝人材壯健願改武職者呈明

吏部移兵部改應考試之法雍正三年令應生到部年二十以上者奏請考試引見乾隆十一年定考試以古論及時務策欽派大臣閱卷評定甲乙進呈御覽文理優通者交部引見荒謬者發回原籍讀書三年再試歷代遵例行光緒三十一年免漢應生考試如滿員例錄用之法漢應生有內用外用改武職用三途內用者雍正元年定制尙書一品用員外郎侍郎二品用主事總督尙書巡撫同侍郎七年改定正一品用員外郎治中從一品用主事正二品用主事都察院經歷京府通判從二品用光祿寺署正大理寺寺副正三品用通政使司經歷太常寺典簿中行評博從三品用光祿寺典簿鑾儀衛經歷詹事府主簿京府經歷四品應生與捐納貢監考職者一例輪班選用乾隆七年定左都御史應同尙書同治十年定河道總督應用員外郎主事宣統間改革官制裁撤各官以相當品級改用外用者乾隆間定制正一品用府同知從一品用知州二品用通判三品用知縣漢世職子爵用知縣終清世無變更改武職用者雍正間定制在京一品尙書等官在外總督將軍應生用都司銜管都司二

品侍郎等官巡撫提督用署都司銜管都司三品副都御史等官布政使總兵
官用守備銜管守備按察使加一品銜副將用署守備銜管守備二品銜副將
用守禦所千總乾隆間定漢子爵三品用千總男爵四品用把總漢軍錄用康
熙十二年原定一品用員外郎二品用大理寺寺正知州雍正七年用知州者
以主事改補乾隆五年定三品用七品筆帖式四品用八品筆帖式宣統元年
吏部奏言漢文武官廕生按品級正從授職滿廕生不分正從漢廕生引見以
內用外用擬旨滿廕生以文職侍衛旗員擬旨惟光緒三十二年以後漢員一
體簡授旗職若現任都統副都統廕生依滿例給廕不無窒礙擬請原係尙書
侍郎改授升授者都統依漢尙書例副都統依漢侍郎例三品以下京堂監司
升授之副都統依漢正二品例仍以內用外用擬旨允之初制非見任官不得
廕內務府佐領以下官不給廕康熙六年定各官不論級銜均依實俸廕子是
年始許內務府佐領以下官子弟給廕十二年並許原品解任食俸者給廕先
是康熙三年定廕監生已得官及科目中式者不得補廕乾隆四十五年改定

嫡長子孫有科名尙未選用及有職銜願承廕者許補廕道光以後捐例宏開
既得官職仍許補廕銓選混沿倖進滋多光緒二十二年御史熙麟奏言吏部
銓選以奉特旨人員統歷各班然如廕生暨及歲引見之員曾捐道府引見奉
諭仍以道府選用者本係捐班部章竟歸特旨班銓選比年以來率皆營私取
巧預捐道府爲他日例邀特旨統歷各班之地致使同一廕生暨及歲人員而
廉吏兒孫興嘆力薄絀袴子弟逞志資緣於世道人心大有關係請以此等人
員加捐道府者與捐納人員同班銓選下部議行難廕順治三年定制官員歿
於王事者依應升品級贈銜並廕一子入監讀書期滿候銓康熙十八年定殉
難官依本銜廕子不依贈銜雍正十二年奏定官員因公差委在大洋大江黃
河洞庭洪澤等湖遭風漂歿者依應升品級廕贈在內洋內河漂歿者減等廕
贈八品以下贈銜不給廕乾隆六十年定官員隨營任事催餉盡力因病身故
者依內洋內河漂歿例廕贈道光二十三年許八品以下官因公漂歿及軍營
病故者贈銜廕一子監生許應試不得銓選光緒二年奏定見任官遇賊殉難

及軍營病故如係以何種官階升用補用卽用並指保升銜者依升階升銜贈銜依實官給廕候補候選者依見任官廕贈休致告病者依原官廕贈降調者依所降官廕贈已揀選之舉人就職就教之恩拔副歲優貢生並考有職銜之捐納貢監生各按品級依見任官廕贈未經揀選舉人依七品例恩拔副歲優貢生依八品例廕增附文生員依九品例廕贈虛銜頂戴人員止子贈銜不給廕乾隆以前旗員效力行間懋著勞績及臨陣捐軀者其子孫例得世職年未及歲已承襲未任職者給半俸綠營員弁陣亡議卹僅得難廕而已乾隆四十九年詔曰旗員及綠營人員效命疆場同一扞忠死事何忍稍存歧視嗣後綠營員弁軍功議叙卹賞仍依舊例陣亡人員無論漢人及旗人用於綠營者一體給予世子襲次完時依例酌給恩騎尉俾賞延於世自是漢員死難者亦多得世職矣凡殉難贈銜總督加尙書銜者贈太子少保銜巡撫加副都御史銜者增左都御史銜布政使贈內閣學士銜按察鹽運使贈太常寺卿銜道員贈光祿寺卿銜知府贈太僕寺卿銜同知知州通判贈道銜知縣贈知府銜教諭

訓導贈國子監助教銜其餘各官按品級比例加贈光緒二年定內洋內河漂歿及軍營病故者減等贈銜惟總督巡撫布政使無庸議減仍減等給廕凡給廕康熙間定制三品以上廕知州四品以下至通判廕知縣布政按察都轉鹽運三司首領官及州縣佐貳六品七品官廕縣丞八品九品官廕縣主簿未入流廕州吏目光緒二年定遇賊殉難官給廕如康熙舊制惟知縣廕州判軍營病故及因公漂歿者減等廕子武職難廕有都司守備千總把總與恩廕改用武職同凡給世職陣亡提督依參贊都統例給騎都尉兼一雲騎尉總兵官依副都統例給騎都尉副將以下把總經制外委以上依參領以下及有頂戴官以上例俱給雲騎給應襲人員年十八歲者送部引見發標學習未及歲者給半俸及歲補送引見光緒間部章恩廕許分發難廕不得援例二十二年熙麟奏言恩廕既分部並外用待之已優又予分發難廕專外川待之已絀又不予分發殊失其平今時事多艱需人孔亟正賴鼓天下忠義之氣俾臨難不苟顧於恩廕則爲顯官兒孫曠功名之路於難廕不爲忠臣後裔開一縷生機

是使國殤飲恨於重泉忠義灰心於臨事請飭部臣援恩格外用例一體分發
補用下部議行特恩乾隆三年詔曰皇考廟庸念舊立賢良祠於京師凡我朝
宣勞輔治完全名節之臣永享禮祀垂譽無窮其子孫登仕籍者固多或有不
能自振漸就零落者朕甚憫焉其旁求賢良子孫無仕宦者或品級卑微者各
都統督撫擇其嫡裔品行材質可造就者送部引見加恩四十七年原任廣西
巡撫滅寇將軍傅宏烈曾孫世海等降旨錄用嘉慶四年追贈已故御史曹錫
寶副都御史依贈銜給予其子廕生歷代眷念功臣後嗣恩旨屢頒光緒季年
海內多故因思將帥有功之臣詔曰咸同以來髮捻回匪次第戡定文武大員
勳績卓著懋賞酬庸閱時五十餘年各勳臣子孫名位顯達者固不乏人而浮
沉下位伏處鄉里者亦復不少令各督撫都統詳察勳臣後裔有無官職彙列
上聞軍機大臣繕單呈覽前西安將軍多隆阿次孫壽慶曾孫奎弼湖北提督
向榮曾孫楷迺全安徽巡撫江忠源孫慎勳曾孫勤培布政使銜浙江甯紹台
道羅澤南孫長耿曾孫延祚協辦大學士四川總督駱秉章孫懋勳曾孫毓樞

江南提督張國樑孫繩祖繼祖巡撫銜浙江布政使李紱寶孫前普曾孫正繩
兵部尚書彭玉麟次孫見綬曾孫萬敵陝甘總督楊岳斌子正儀孫道澂四川
提督鮑超次子祖恩孫世爵署安徽巡撫布政使李孟羣孫興仁興孝江西南
贛鎮總兵程學啟嗣子建勳廣東提督劉松山孫國安曾孫家琨貴州提督馮
子材次子相華孫承鳳等命各按官級升用無孫者各援例簡放補用湖南提
督塔齊布令訪明立嗣奏請施恩其明年又詔開列勳績最著之臣前雲貴總
督劉長佑臺灣巡撫一等男劉銘傳贈布政使道員王翁綬遠城將軍福興福
建陸路提督一等男蕭孚泗記名提督一等子河南歸德鎮總兵李臣典浙江
提督鄧紹良都統銜廣東副都統烏蘭泰署廣西提督甘肅肅州鎮總兵張玉
良工部左侍郎呂賢基清運總督袁甲三都察院副都御史江西巡撫張芾署
貴州巡撫韓超布政使銜福建督糧道趙景賢雲南鶴麗鎮總兵朱洪章直隸
提督郭松林廣東等省巡撫蔣益澧布政使銜江南道員溫紹原署安徽廬鳳
穎道光筋護軍統領恒齡新疆巡撫一等男劉錦棠記名提督廣西右江鎮

總兵張樹珊贈布政使銜升川知府天津知縣謝子澄令各都統督撫訪明有無後嗣有何官職請旨施恩若夫乾隆四十八年錄用明臣經略熊廷弼五世孫世先督師袁崇煥五世孫炳則推恩特膺勝代忠臣後裔尤曠典也

任官之法文選吏部主之武選兵部主之吏部四司選司掌推選職尤要凡滿漢入仕有科甲貢生監生廕生議叙雜流捐納官學生俊秀定制由科甲及恩拔副歲優貢生廕生出身者爲正途餘爲異途異途經保舉亦同正途但不得考選科道非科甲正途不爲翰詹及吏檢二部官惟旗員不拘此例官吏俱限身家清白八旗戶下人漢人家奴長隨不得濫入仕籍其由各途入官者內則修撰編檢庶吉士主事中書行人評事博士外則知州推官州縣教授由進士除授內閣中書國子監學正學錄知縣學正由舉人考授及大挑揀選小京官知縣教職州判由優拔貢生錄用員外郎主事治中知州通判由一二品廕生考用此外貢監生考職用州判同州縣丞主簿吏目京通倉書內閣六部等衙門書吏供事五年役滿用從九品未入流禮部儒士食糶三年用府檢校典史

吏員考職一等等用正八品經歷二等等用正九品主簿三四等等用從九品未入流官學生考試用從九品筆帖式庫使外郎俊秀識滿漢字者考繙譯優者用八品筆帖式厥後官制變更略有出入其由異途出身者漢人非經保舉漢軍非經考試不授京官及正印官所以別流品嚴登進也凡內外官分滿洲缺蒙古缺漢軍缺漢缺滿洲又有宗室內務府包衣缺其專屬者奉天府尹奉錦山海吉林熱河口北山西歸綏等道缺各直省駐防官理事同知通判爲滿洲缺唐古特司業助教中書游牧員外郎主事爲蒙古缺欽天監從六品秋官正爲漢軍缺宗人府官爲宗室缺內務府官爲內務府包衣缺此外京師各衙門陵寢衙門盛京五部各直省地方俱設額缺滿洲京堂以上缺宗室漢軍得互補漢司官以上缺漢軍得互補外官蒙古得補滿缺滿蒙包衣皆得補漢缺惟順天府府尹府丞奉天府府丞京府京縣官司坊官不授滿州刑部司官不授漢軍外官從六品首領佐貳以下官不授滿洲蒙古道員以下不授宗室其大凡也官吏論俸序遷曰推陞不俟俸滿遷秩曰卽陞內而大學士至京堂外而督

撫藩臬初因明制由廷臣會推嗣停會推開列題請太常鴻臚滿洲少卿開列引見不開列以應陞員擬正陪引見授官曰揀授論俸推取二十人引見授官曰推授京司官小京官筆帖式分留授調授揀授考授皆引見候旨餘則選外官布政使按察使開列運使請旨道府缺有請旨揀授題授調授留授餘則選應州縣缺同道府無請旨者佐雜教職鹽官要缺則留餘或咨或選初京司官缺題選無定例長官以意爲進退久之員缺率由題補而應陞應補應選者多致沈滯乾隆九年詔以各司題缺咨部註冊餘缺則選不得混淆於是定各部各司漢郎中員外郎主事各幾缺題授餘若干缺則選道光間更定題補缺額嗣各部時有增益順治十二年詔吏部詳察舊例參酌時宜析州縣缺爲三等選人考其身言書判亦分三等授缺以是爲差厥後以衝繁疲難四者定員缺緊要與否四項兼者爲最要三項次之二項一項又次之於是知府同通州縣等缺有請旨調補部選之不同凡選缺分卽選正選插選併選抵選坐選各辨其積缺不積缺到班者選之選班有服滿假滿俸滿開復應補降補散館庶吉

士進士舉貢廩生議叙捐納推陞大選雙月急選單月滿蒙漢軍上旬漢官下旬筆帖式中旬初制選人均到部投供點卯已而例停令各回籍部查年月先後掣選寄憑赴任康熙二年給事中于可託言寄憑既慮頂冒遠省選人往返輒經年遇有事故繳憑更選亦復需時懸缺遲久勅署員肆貪催新任速赴者連章見告宜仍令人文到部按次銓選八年御史戈英復以爲言議行自是應選者悉赴部投供點卯爲永制聖祖念選人一時不能得官往往飢寒旅邸令吏部截留一年選人留京餘聽回籍御史田六善言牛載以來截留推官八十選一人知縣三百選三十一人餘須守候三四年陪掣空籤選期難料當按名挨掣實籤臨選前兩月投供下部議能按月點卯及掣空籤詔減牛載留人數選人投供初於應選前月十五日距選期近出缺美惡易滋弊後改每月初一日投供間一選期銓補著爲令選人得缺初試以八股時文尋罷改書履歷三百字條列治民厚俗催科撫字讞獄聽訟諸方法謂之條陳補任陞任並須數陳舊任地方利弊然條陳多情作或但作頌聖語其制未久亦廢選人例由吏

部會九卿驗看後增科道詹事康熙二十七年從御史荆元質言令州縣同選等官掣缺後俱隨本引見後世踵行焉故事大臣驗看月官查有行止不端出身不正祖父有錢糧虧空或人缺不相當者以聞乾隆時月官有人缺不稱引見時帝輒爲移易頗足劑餘法之窮十年引月官帝以知縣周仲等四人衰頹特降教職十二年復親汰衰庸不勝知縣四人而切責驗看諸臣之不糾舉厥後分發候補試用之州縣同通且一體引見不限實官久之州縣同通在外補官及雜職分發並得援例捐免引見驗看益視爲具文無官輕重矣內外官互用本有成例初行內陞外轉制在內翰詹科道四衙門品望最清陞轉特異他官編檢邊中尤贊善曰開坊他若翰詹坊局國子監堂官京堂俱得陞調大考上第擢尤不次外轉例始順治十年詔定少詹事以下二十一員用司道治行優者內擢京堂尋更定正少詹事用布政侍讀學士用按察中尤用參政編檢用副使十八年復定侍讀以下每年春秋外轉各一員讀講用參政修撰用副使編檢用參議未幾例停康熙二十五年甄別翰林官平常者外用同知運副

提舉通判二十八年編修李澐外簡知府翰林官授知府自澐始三十七年左都御史吳瀚言編檢陞轉滯請破格外用照編修李澐檢討汪樹例補知府一二人若破格改授請照少詹王士禎徐潮侍讀顧藻編修王九齡例用副都御史通政使帝納其言爲授檢討劉瀚知府雍正初以編檢庶吉士人多內用科道吏部外用道府州縣以疏通之嗣是編檢率內陞坊缺用科道外授道府以爲常吏部六官之長初定司官內陞外轉歲各一人已罷其制康熙八年用御史余縉言復之四十年例復停與他部司員一體較俸給事中陞轉歲一次御史倍之外簡道府內擢京堂康熙五十九年詔定曆俸制由編檢郎中授者限二年員外郎或主事授者遞增一年乾隆十六年定科道三年陞轉一次五十五年停其例內官外用京察外有截取保送皆俟俸滿保送分發截取則遞繁簡由長官定之府牧令丞俸皆得以其班次改外外官內陞初定司道歲三人漢人以科目出身且膺卓異俸薦俱優者爲限知縣行取蓋仿明制初有薦推知皆得考選科道康熙間屢詔部臣行取實能內用科道吳江知縣郭秀清

苑知縣邵嗣堯三河知縣彭鵬震壽知縣陸隴其麻城知縣趙蒼璧皆以大臣薦舉行取授御史得人稱最四十三年川撫能泰請罷督撫保題例帝聽之詔嗣後知縣無錢糧盜案者省行取三四員明年御史黃秉中言知縣考選科道殊覺太驟廷議停止尋定行取三年一次直隸江南湖廣陝西各五員餘省三員一員不等以主事補用雍正間刑部尙書徐本請復行取御史舊制格於部議行取官用主事者初選補猶易後與捐納間補遂病壅滯乾隆元年令視武官保舉註冊例仍留本任已赴京者許外補同知時各省視行取爲具文例以無參罰之次等州縣應選十六年罷之迨光緒季年令州縣以上實官及曾嘗缺者一體考試御史非復行取遺意亦行之未久而罷銓選按格擬註憑籤掣缺拘於成例歷代間行保薦制以補銓法之不逮順治初定保舉連坐之法十二年以直隸保定河間江南江甯淮揚蘇松常鎮浙江杭嘉湖紹等三十府地方緊要詔京外堂官督撫各舉一人備簡不次擢用已有以貪庸敗者給事中任克溥言皇上對天下知府中權其繁劇難治者三十許二品以上官薦舉破

格任用爲時未久以貧劣劾罷者數人諸臣不能仰承聖意秉公慎選乞下吏議從之康熙七年詔部院滿漢官才能出衆者許不計資補用明年吏部請罷保薦仍循俸次陞轉以杜饋賄賂報可四十年令總督郭琇張鵬翮巡撫彭鵬李光地等各舉道府州縣惠愛清廉者以聞世宗御極屢詔京外大臣薦舉道府同通州縣所舉非人輒遭駁議戶部尙書史貽直言遷擢宜循資格資格雖不足以致奇士而可以造中材捐棄階資俸進者不以爲獎勵之公而陰喜進取之獨巧沈滯者不自咎才智之拙而徒怨進身之無階請照舊例循階按級以次銓除果才猷出衆治行卓越仍許破格薦擢從之乾隆間厲行保薦之法司道府守多由此選宜宗初元郎中鄭裕知府阿麟唐仲冕皆以大臣推舉陟方面擢疆圻曆代相沿革以薦賢舉能責諸臣工間亦破格任用初京職簡道府疆吏察其才不勝任疏請調京任用多邀俞允乾隆初廷臣有以衰廢之人不宜復玷曹司爲言者詔切止之嗣是外官才力不及者但有休致降補無內用矣官吏陞轉論俸惟外官視年勞爲差異於京秩在外有邊俸有腹俸腹

俸之道府州縣佐貳首領官五年無過失例得遷擢邊俸異是廣東崖州感恩昌化陵水等縣廣西百色太平寧明明江鎮安泗城凌雲西隆西林等府廳州縣及忠州河池等數十雜職爲煙瘴缺雲南元江鶴慶廣南普洱昭通鎮邊等府通判同知鎮雄恩樂恩安永善霽洱寶寧等州縣貴州古州兵備道黎平鎮遠都勻銅仁等府同知清江都江丹江通判永豐知州荔波知縣四川馬邊越嶲同知爲苗疆缺俱三年俸滿有政績無差忒者例卽陞用江蘇太倉上海等十縣浙江仁和海寧等十七縣山東諸城膠州等七州縣廣東莞香山等十三縣福建閩候等九縣爲沿海缺直隸良鄉通州等十二州縣河南祥符鄭州等十一州縣山東德州東平等十三州縣江南山陽邳州等十三州縣爲沿河缺曆俸陞擢與邊俸同邊疆水土惡毒或不俟三年卽陞其水土非甚惡劣苗疆非甚緊要者陞遷或同腹俸乾隆間定邊缺夷疆海疆久任之制陞用有須滿八年或六年者則爲地擇人不拘承常例也選班首重科目正途初制進士知縣惟雙月銓五人選官有遲至十餘年者雍正二年侍郎沈近思請單月復

銓用四人於是需次二三年卽可得官舉貢與進士雖並稱正途而軒輊殊甚順治間貢生考取通判終身無望得官乾隆間舉人知縣銓補有遲至三十年者廷臣屢言舉班壅滯然每科中額千二百餘人綜十年計之且五千餘人銓官不過十之一謀疏通之法始定大挑制大挑六年一舉行三科以上舉人與焉欽派王大臣司其事十取其五一等二人用知縣二等三人用學正教諭用知縣者得借補府經歷直隸州州同州判縣丞鹽庫大使用學正教諭者得借補訓導視前爲疏通矣異途人員初與正途不相妨康熙初生員例監吏員出身官須經堂官督撫保舉始陞京官及正印官無保舉者郎中員外郎主事以運同府同知分別補用漢軍捐納官朝考後方得授官十八年復令捐納官蒞任三年稱職者題請陞轉否則參劾以示限制自二十六年以宜大運輸許貢監指捐京官正印官者捐免保舉尋復許道府以下納貲者三年後免其具題一例陞轉於是正途異途始無差異乾嘉以後納貲之例大開洎咸同而尤濫始甚捐納外復有勞績一途捐納有馮缺儘先花樣勞績有無論題選咨留遇

缺卽補花樣而正途轉相形見絀甲榜到部往往十餘年不能補官知縣遲滯尤甚光緒二年御史張觀準條上疏通部員之法一捐納部員勿庸減成一主事俸滿卽准截取一散館主事儘數先選一進士主事准以知縣改歸原班銓選報可順天府府尹蔣琦齡亦言各省卽用知縣不但無補缺之望幾無委署之期至有以得科名爲悔者廷臣多以進士知縣壅滯紛請變更成例帝輒下所司影議十六年御史劉綸襄言近日諸臣條奏選補章程吏部議數日不暇給朝廷設官惟期任用得人以資治理非能肖天下仕者使盡償所願也國家缺額有定士子登進無窮安得如許美官以待縈情應仕之人徒滋紛擾無濟於事帝爲下詔切止之是時異途競進疆吏多請停分發吏部以仕途倖濫申多用科甲之請勢已積重不能返也滿人入官或以科目或以任子或以捐納議叙亦同漢人其獨異者惟筆帖式京師各部院盛京五部外省將軍都統副都統各署俱設筆帖式額缺其名目有繙譯繕本貼寫其階級自七品至九品其出身有任子捐納議叙考試凡文武繙譯舉人貢監生文武繙譯生員官義

學生驍騎閑散親軍領庫使皆得與試入選者舉貢用七品生監用八品官
義學生驍騎閑散等用九品六部主事額設百四十缺滿蒙缺八十五補官較
易筆帖式摺補主事或不數年輒致通顯其由科甲進者編檢科僅數人有甫
釋褐卽遷擢者翰林坊缺編檢不數補用得以部院科甲司員充之謂之外班
翰林外官東三省新疆各城各省駐防文武大員俱用滿人甘肅新疆等邊地
道府同通州縣各省理事同知通判皆設滿洲專缺滿缺外漢缺亦得補用其
有終養回旗得授京秩內外文職選補一時不能得官及降調咨回各員許改
授武職尤特例也保舉爲國家酬庸之典所以勵勞動待有功也曆朝纂辦實
錄各館奉敕修書及各省軍管河工徵賦緝盜有功者獎叙康熙十一年世祖
實錄成四十九年平定朔漠方略成副總裁以下官但獎加級六十一年算法
成書始議以三等叙功獎應陞加等卽用有差康雍兩朝實錄成從總裁請無
議叙嘉慶間修書館臣請超一二等優獎帝不許尋定非特旨專設之官不得
議叙陞用曆代踵行其軍管河工等獎案始不過加級或不俟俸滿卽陞名器

非可倖邀迨季世以保舉爲捷徑京外獎案率冒濫不遵成例光緒元年御史王榮瑄請下越階保陞之禁帝愜之三年以纂修穆宗實錄過半與事諸臣俱保陞並加銜備極優異十年部議限制保舉五六品京堂翰詹坊缺及遇缺題奏俱不得擅保未幾仍有以候補郎中保京堂編檢保四五品坊缺及應陞缺並開列在前者咸同軍興保案踵起吏部於文選司設專處司稽核事之繁重與一司埒同治十二年閩撫王凱奏言軍興以來保案層迭開捐以後花樣紛繁軍營保案藉花樣以爭先恐後各項保舉又雙軍營名目以紛至沓來名器之濫至今已極盈千累百徒形冗雜請勅部察核京外各班人員酌留二三成餘令回籍候咨取下所司設議軍功外號稱尤濫者爲河工保光緒二十年御史張仲忻言山東河工保案近年多至五六百人部定決口一處獎異常尋常者六人該省所報決口多寡輒以所保人數爲衡圖保者以山東爲捷徑捐一縣丞佐雜不數月卽正印矣請飭所司嚴定章程帝俞其請三十二年御史劉汝驥復言吏治之益莫如保舉一途其罔上營私者一曰河工國家歲糜數十

萬帑金以慎重河防封疆大吏乃以此爲調劑屬員之舉幸而無事丞倅保州縣矣同通保府道矣一日軍功工廠之鼓噪飢民之嗷聚輒浮夸其詞曰大張撻伐耳未聞鞞鼓足未炒沙場而謬稱殺敵致果身經百戰者比比然也一日勸捐順天賑捐一案保至千三百餘人山東工賑保至五百餘人他省歲計亦不下千人請嚴禁徇情濫保以杜倅進下所司核議限制之法其時吏部投供月多至四五百人分發亦三四百人選司原設派辦處司其事者十餘人猶虞不給季年乃毅然廢捐納停部選爲疏通仕途慎選州縣之計然捐例雖停而舊捐移獎層出不窮加以科舉罷後學堂卒業立獎實官舉貢生員考職大逾常額且勳臣後裔悉予官階新署人員虛銜奏調紛然錯雜益難紀極宣統三年裁吏部設銓叙局雖有刷新政治之機而一代銓政終不復能廓清也武職隸兵部八旗及營衛官之選授武選司掌之內而驍騎前鋒護軍步軍火器健銳虎槍各營外而陵寢園場熱河烏里雅蘇台科布多阿爾泰烏梁海西寄西藏塔爾巴哈台游牧察哈爾綏遠城各省駐防皆旗缺屬八旗門千總爲門缺

屬漢軍河營陸路水師皆管缺滿漢分爲漕運爲衛缺漢軍漢人得兼補旗缺副都統以上開列餘則揀選五品以上題補六品以下咨補綠旗總兵以上初用會推嗣罷其例開列具題副將投供引見亦有開列者其次要缺則題前則推把總拔補其大略也凡滿漢入仕有世職廕生武科八旗世職公侯伯子男補副都統輕車都尉騎都尉補佐領雲騎尉補防禦恩騎尉補駙騎校漢伯子男用副將輕車都尉用參將騎都尉用遊擊或都司雲騎尉用守備尙書至副都御史等官總督將軍至二品銜副將廕生改武者用都司守備守禦所千總衛千總武科進士一甲一名授頭等侍衛二三名授二等侍衛二三甲揀選十名授三等侍衛十六名授藍翎侍衛餘以營衛守備補用漢軍漢人武舉揀選一二等用門千總及營千總三等用衛千總其以資勞進用者營伍差官提塘隨幫隨營差操經制及外委千把總無責任効用官因功加都督至副將等銜者用遊擊加參將遊擊銜者用都司加都司守備銜者用守備加千總銜者拔補把總武進士武舉充提塘差官滿三年由部考驗弓馬優者用營衛守備次

者武舉用防禦所千總武舉隨營差揀滿三年以管千總拔補隨幫三運報滿用衛千總凡部推之缺歲二月叅將遊擊缺用漢一二等侍衛一人四六八月遊擊都司缺用漢三等侍衛三人正三五七九月都司缺用藍翎侍衛五人正月七月營守衛缺以門衛千總陞用其餘單月缺輪補之班七雙月缺輪補之班十二衛守備單月缺輪補之班十一雙月缺輪補之班六守禦所千總衛千總缺俱不論雙單月推選惟門千總專於雙月銓補焉滿人入官以門閤進者多自侍衛拜唐阿始故事內外滿大臣子弟五年一次挑取侍衛拜唐阿以是閑散人員勳舊世族一經揀選入侍衛衛外膺簡擢不數年輒致顯職者比比也綠旗武職占缺尤多向例山海關至殺虎口保德州副參遊都守缺綠旗補十之三滿洲補十之七馬蘭泰等二鎮直隸山西沿邊副參遊都守缺滿漢各補其一雍正六年副都統宗室滿珠錫禮言京營參將以下千總以上不宜專用漢人得旨滿洲人數本少補用中外要缺已足若京營參將以下悉用滿洲則人數不敷勢必有員缺而無補授之人乾隆間迭發各省武職率以滿人應

選帝曰綠營將領滿漢參用必須員缺多寡適均方合體制若概將滿員揀發
行之日久綠營盡成滿缺非所以廣捨選而勵人材飭所司議滿漢間用之法
兵部議上凡行走滿二年之漢侍衛與巡捕營八旗滿蒙人員由該管大臣保
送記名揀發時與在部候補候推者按滿漢分派引見如所議行三十八年兵
部復疏言直隸山西陝西甘肅四川五省自副將至守備滿缺六百四十七各
省自副將至守備千一百七十九缺向以綠營人員選補現滿蒙在綠營者逾
原額兩倍實綠各省請員時多用滿員揀選請嗣後除原用滿員省外外其河
南山東江南江西湖廣腹地及閩浙兩廣海濱煙瘴等省需員請揀應於綠營
候補候選及保卓薦人員並行走年滿之頭二三等待衛藍翎侍衛一併揀選
從之自是綠營滿漢員缺始稍劑其平非復從前漫無限制矣武職以行伍出
身爲正途科目次之故事考驗部推人員衰老病廢者勒令休致惟軍功帶傷
者雖年老仍行推用副參例以俸深參遊題補若有軍功保舉雖俸淺亦得與
焉科目自康熙初卽病瘵滯御史朱斐疏請定科目行伍分缺選用之制外委

効力等與武進士武舉較人數多寡做二八分缺之例先選科目人員其外委各亦須有戰功及捕盜實績不得止憑咨送選補下所司議行雍正初廷臣有請改併衛所各州縣者部議科甲人員專選衛所守備千總若盡裁衛所必致選法壅滯事不可行帝不許爲定榜下進士增用營守備以調劑之乾隆十五年給事中楊二酉言各省衛守備歸部選者三十九缺現武進士以衛用者積至數百人提塘差官効力報滿歸班選用者亦數十人加以新例飛班壓銜缺少班多選用無期請照乾隆元年例將三等武進士再行揀選一二等以管用三等仍以衛用報可向例揀選武進士以管用者選缺猶易衛用往往滿滯不能得官洎道光間衛用武進士得捐改管用而裁缺衛守備衛千總守禦所千總均准改歸綠營管守備以上官並得報捐分發由是部推外補同一沈滯不僅科目爲然矣凡不屬於部推之缺皆題補豫保註冊者最先授定例邊疆內河外海水師員缺及陸路緊要者得豫保康熙九年兵部疏言總督提鎮遇標營員缺不論地方緩急銜缺相當輒將標員坐名題補使俸深應補人員致多

壅滯請定副將以下守備以上缺出實係近海沿邊巖疆人地相宜者酌量題補餘不得率行題請從之雍正五年詔部推缺由各督撫提鎮保題備用乾隆初罷陸路近省豫保例十年江督尹繼善言武職豫保咨部註冊遇缺掣補誠慎重要缺之良法乃或豫保之初年力本強數年後漸已衰老騎射生疏營伍廢弛請將豫保滿三年未得缺者各提督再行甄別果堪陞用出具考語咨部否則註銷報可其時保薦別以三等限以五年於副將堪勝總兵參將堪勝副將者尤慎選一經保薦輒予陞擢洎咸同軍興十餘年保題舊例不復行所恃以鼓勵人材者惟軍功保舉獎叙之案層出不窮以兵丁積功保至提鎮記名者殆難數計同治五年詔以記名提鎮無標營可歸者發往各省各營差遣各省投標候補者提鎮多至數十副參以下數百本職補官終身無望於是定借補之法提鎮准借補副參遊缺副參遊准借補都守缺都守准借補千把總缺雖內停部推外部儘先仍不足疏通宥滯光緒季年詔裁綠營練新軍罷武科設武備學校一時新軍將弁與學成授官者特爲優異歷朝武職尊重行伍之

意蕩無復存雖絲管武職未盡廢除然無餘法可言云

清史稿

志

選舉六

考績

三載考績之法昉自唐虞清沿明制而品式略殊京官曰京察外官曰大計吏部考功司掌之京察以子卯午酉歲部院司員由長官考覈校以四格懸才守政年爲鵠分稱職勳職供職三等列一等等者加級記名則加考引見備外用糾以六法不謹罷職者革職浮躁才力不及者降調年老有疾者休致註考送部自翰詹科道外依次過堂三品京堂由部開列事實四五品由王大臣分別等第具奏引見取上裁大計以寅巳申亥歲先期藩臬道府遞察其屬賢否申之督撫督撫覈其事狀註考繕冊送部覆覈才守俱優者舉以卓異劣者劾以六法不入舉劾者爲平等卓異官自知縣而上皆引見候旨六法處分如京察貪酷者特參凡京察一等大計卓異有定額京官七而一筆帖式八而一道府廳州縣十五而一佐雜教官百三十而一以是爲率非歷俸滿者未及年限者革

職留任或錢糧未完者滿官不射布靶不諳清語者均不得膺上考其大較也
順治八年京察始著爲令以六年爲期十三年吏部奏定則例三品以上自陳
四品等官吏部都察院考察議奏親定去留筆帖式照有職官例一體考察遇
京察時各官暫停陞轉尋復定考滿議叙例三年考滿與六年察典並行十七
年從都御史魏裔介請行糾拾之法以補甄別所未及康熙元年罷京察專用
三年考滿例三品以上仍自陳餘官分五等一等稱職者紀錄二等稱職者賞
賚平常者留任不及者降調不稱職者革職三年御史季振宜請停考滿三疏
極言徇情鑽營章奏繁擾無裨勸懲因停考滿自陳例六年復行京察明年甄
別不及官三十七員嗣以各部院甄別司員類多末職二十三年嚴諭指名題
參復甄汰王三省等三十六人明年京察又停雍正元年復舉行改爲三年自
是爲定制初京察一等無定額康熙三年御史張冲翼疏請以部院員數之多
寡定一二等名數以息奔競從之乾隆間部院保送一等或浮濫溢舊額詔停
兼部行走仍歸本衙門另班聲叙暨到任未滿半年仍由原衙門註考等例又

罷未授職庶吉士保列一等之例以示限制四十二年命部院保送一等人數
毋庸過泥上屆成例遞行裁減以防溢額應將上兩次數目比較酌中定制既
無慮濫臍保薦亦不至屈抑人才五十年定例保送一等人數以不溢四十八
年原額爲準後世踵行間有增損無甚懸殊也向例部院司官由吏部都察院
考覈雍正四年命內閣大學士同閱乾隆九年帝慮部院堂官有瞻徇情而濫
列一等者敕大學士驗看慎重甄別不稱一等者裁去十一年諭曰前命大學
士分別去留亦權宜辦理之道察覈司員惟堂官最爲親切要在平日留心體
察臨時舉措公平如上次定一等者三年中行走平常當改爲二三等上次原
列二三等者三年中知所奮勉卽改爲一等庶察典肅而人知勸懲厥後考察
權責悉屬吏部驗看特奉行故事而已大臣循例自陳求斥罷候旨照舊供職
國初以來行之乾隆八年曾諭大臣自陳罷斥者舉賢自代嗣以所舉不得其
人或樹黨營私行不久卽罷十七年帝以內外大臣親自簡擢隨時黜陟奚待
三年自陳繁文相率爲僞甚無謂也詔罷其例先是京堂官無甄敘例乾隆十

五年帝以三品以上堂官具本自陳部院司員皆令引見而四五品京堂不在自陳之列亦無引見之例吏部都察院考語無實龍鍾庸劣者得姑容才具優長者無由見特派王大臣分別等第奏聞引見十八年敕吏部開列三品京堂事實親爲裁奪四十八年以三品京堂不便派大臣驗看令吏部帶領引見嘉慶十二年以三四品京堂向來京察但有降黜無甄敘既與內外大臣辦理兩歧並不得與部院司員同邀加級於是予太常少卿色克精額等議敘而予陳鍾琛等休致自後三品以下京堂始有甄敘之例矣年老休致例有明文乾隆二十二年定部院屬官五十五歲以上堂官詳加甄別三十三年改定京察二三等留任各官六十五歲以上引見嘉慶三年命京察二三等官引見以年逾七十爲限尋復舊例六法處分恭嚴長官往往博寬大之名每屆京察祇黜退數人虛應故事餘概優容而被劾者又不免屈抑雍正中汪景祺查嗣庭輩論列時政以部長熱滯爲言有十年不調白首爲郎等語帝責以怨望誹謗而事實不得謂誣蓋部員冗濫康雍時已然矣乾隆三年鴻臚少卿查斯海疏言京

官被劾不無以嫌隙入吏議者京察六法官應援大計例送部引見從之乾隆末士夫習爲諂諛堂官拔職司員率以逢迎巧捷爲曉事察典懈弛仁宗初銳意求治頗思以崇實黜華獎勵氣節風示天下嘉慶五年詔部院堂官慎重選舉猷守兼優者膺百薦餘甯取資格較久謹愿樸實之員其少年浮薄才華發越者應令深其經練下屆保列尙書侍郎各備冊密識賢否公議同覓十一年大學士尙書等議奏京察事宜指納人員限以年資軍機處司員能兼部務者方列上考不許濫保充數報可道光四年候際清贖罪舞弊一案刑部司員恩德等朋謀撞騙堂官以謬登薦牘保列一等下部議處諭嗣後京察有冒濫徇私者連坐七年給事中吳傑奏大計軍政皆有舉有劾近年六部辦理京察除保舉一等外不問賢否概列二等間有三等數人仍予留任六法不施有勳無懲應申明舊章舉劾並用帝聽其言降諭飭行十五年令於京察外隨時糾參以爲補救咸豐十年刑部堂官濫保不諳例案之員朝廷務循寬大輒以相習成風不獨刑部爲然多爲原宥僅予大學士桂良等鑄級留任出考堂官罰俸

而已穆宗卽位大難未平厲精澄叙五年詔部院堂官謹遵嘉慶五年備冊密
識賢否公議同覽之說前常川進著與司員講求公事藉覘其屬賢否八年又
諭京察不得有舉無劾冀泐滌舊習一新庶政然積重之勢不能復返光緒七
年禮部侍郎寶廷疏陳京察積弊言之痛切謂瞻徇情面之弊不專在部院堂
官當責樞臣考察必公必嚴樞臣果精白乃心破除情面不特能考察部院司
員之賢否並能考察內外大臣之賢否而考察樞臣功過在聖明獨斷若朝廷
先以京察爲故事具文何責乎樞臣更何責乎部院堂官論雖切中而難實行
徒託空言而已宣統二年吏部設立憲政籌備處改考功司爲考績科主文職
功過應行變通事宜其時浮議紛紜新舊雜糅吏部等於贅疣矣大計始順治
二年御史張澂疏請有司殿最宜以守己端潔實心愛民爲上考部覆如議明
年定朝覲考察頒五花冊令督撫以四格註考故事計參外嶽省例有拾遺是
歲計羣吏止據撫按所揭爲黜陟臺省擬循故事內大臣不喜大學士陳名夏
力主之給事中魏象樞亦以爲請得旨糾拾官照大計處分挾私妄糾者論自

後臺省意存瞻顧糾拾者妙已罷不行而督撫權乃日重矣四年定大計三年一舉計處官不許還職諭朝覲官曰貧酷重懲闕茸罔貫爾等姑許留任當思拔濯前愆勉圖後效嗣是每屆入覲之年必嚴切誡飭以爲常舊例朝覲計典藩臬府州縣正官皆入覲順治九年止令藩臬各一員各府佐一員代覲十八年給事中雷一龍疏言三年大計勿得遣大吏而摘微員懲去位而寬現在請令藩臬赴部而同指實按冊詳察下部議行康熙元年停藩臬入覲以參政副使等官代十二年復令藩臬入覲二十五年以朝覲藉端苛派茲弊滋生藩臬府佐入覲例悉罷官吏賢否去留憑督撫文冊布按二司冊籍悉停止國初大計與考滿並行康熙元年罷大計止行考滿司道歷腹俸二年邊俸一年半有司歷邊俸二年腹俸三年錢糧全完者許考滿分別地方荒殘衝疲充實簡易四者開註以政績多寡酌定等第四年考滿停復行大計爲永制大計舉劾註考例由州縣正官申送本府道考覈教官由學道鹽政官由該正官考覈轉呈布按覆考督撫覈定咨達部院河官兼有刑名錢糧之責者總河督撫各行考

覈專管河務者總河自行考覈具題康熙二十三年以藩臬與督撫親近停其卓異凡卓異官紀錄卽陞不次擢用歷朝最重其選徇私濫保者罪之康熙初御史張冲翼請申嚴卓異定額以詳覈事蹟使名實相副爲言下部議六年從御史田六善請卓異官以清廉爲本司道等官必註明不派節禮索餽送州縣等官必註明不派雜差重火耗虧損行戶強貸富民以清吏之有無定督撫之賢否其時廉吏輩出靈壽令陸隴其等擢隸憲府吏治蒸蒸稱極盛焉四十四年詔舉卓異務期無加派無濫刑無盜案無錢糧拖欠倉庫虧空民生得所地方日有起色其他虛文不必開載乾隆八年命督撫以務農本計察覈屬員論者謂以勸農爲勸吏之要深得治本與漢詔同風先是雍正六年定卓異薦舉失實處分自行奏參者免卓異官有貪酷不法或錢糧盜案未清發覺者原薦督撫處分較司道府爲輕乾隆四十八年改定卓異官犯贓覈其年月在原薦上司離任前後分別議處臬司道府減督撫一等藩司照督撫例以道府按例轉詳督撫藩司親爲覈定也五十年帝以保薦卓異向分正附未明定限制易

開徵倖之漸敕部詳覈各省大小缺分多寡酌中定制裁去附薦名目於是各省卓異官有定額終清世無大變更也八法處分行之既久長吏或視爲具文每將徵員細故填註塞責歷朝訓諭諄諄力戒瞻徇猶防冤抑雍正元年詔大計降級罰俸官例不許卓異果有居官廉幹因公註誤者准與卓異又以卓異八法舉劾不過數十人其不列舉劾之平等官自知縣以上令督撫註考報部察核四年諭參劾人員或有冤抑及避重就輕等弊除貪酷官無庸引見外其不謹浮躁不及等被劾官督撫給咨送部引見乾隆二十四年帝以八法參本內不謹浮躁官未將何事不謹何事浮躁一一聲叙或有公事無誤而節目闕疏才具有爲而氣質粗率上司以意見不洽概登白簡不無可惜其或敗檢驗閱僅與避重就輕均非整飭官方之意命詳註實迹不得籠統參劾嘉慶八年定督撫隨時參劾庸劣平庸等事未列叙實迹被劾官情願赴部引見者得援大計六法例此則考覈不厭詳密冀揆求遺才輔計典之不及也嘉道以後計典一循舊例督撫奉行故事鮮克振刷道光八年山東大計卓異護撫賀長齡

原註新城令容昌悃懃祥等語詔以寬厚難膺上考令各省薦舉體用兼備
熟明治理者咸同軍興或地方甫收復有待撫綏或疆圉偪寇氛亟辦保衛救
各督撫留心存記廉能之員列上考備擢用時督撫權宜行事用人不拘資格
隨時舉措固不能以大計常例繩其後也光緒間言者每條奏計典積弊請飭
疆臣認真考察屢詔戒飭然人才既衰吏治日壞徒法終不能行二十八年詔
各省設立課吏館限半年具奏一次三十一年定考覈州縣事實分最優等優
等平等次等四級顧課吏祇憑一日文字考覈僅據一年事實責以公當蓋亦
難矣宣統二年憲政編查館疏請考覈州縣分別學堂巡警工藝種植命盜詞
訟監押錢漕以爲殿最由主管衙門另訂考覈章程名目繁多表冊虛偽徒飾
耳目於勸懲無當也至若俸例翰詹大考分別優劣陞調降革有差爲特別考
績之法外省司道年終有密考州縣一年期滿教佐六年俸滿皆有甄別則又
隨時考核之法不屬於察計二典者

武之軍政猶文之考察兵部職方司掌之內外衛所分屬於武選司在京武職

由管旗及部院覈奏各省由統兵大員註考京營千總以上外省綠營守備以上各由長官考覈分操守才能騎射年歲四格舉劾與文職同三品以上自陳由部疏聞候旨八旗世爵則校其藝進退之綠營舉劾每於軍政後一年半舉行題陞一二人入薦舉班陞用劾者照軍政處分此其大略也國初未立限制順治九年定六年一舉是爲軍政考覈之始十一年改定五年爲期十三年從給事中張文光請軍政卓異照文官賜服旌勸後改爲加一級康熙元年停軍政專行考滿旣而兵部疏請直省武職應依文官例按年限由總督提督會同舉劾御史季振宜疏言武職考滿營謀優等尅扣軍餉貽誤封疆請按歷俸功次陞轉於是六年定舉行軍政事宜京外武職長官註以四格並詳列履行軍功分別去留咨部必註明行止端方弓馬嫻熟管轄嚴肅供職勤慎不擾害地方等考語方許薦舉必有八法等款實迹始行糾參復令提督總兵官自陳提督由總督註考總兵官由總督提督註考無總督省分巡撫註考嗣以滇省用兵海內騷動羽書倥傯軍政曠不舉行者十年至二十一年滇逆蕩平從給事

中碩穆科請舉行軍政大典各官事實履行自康熙十一年軍政後開起九門千總等由九門提督註考候補總兵官亦令自陳副將以下候缺者照舊例考察六十年命在京武職領侍衛內大臣八旗都統前鋒護軍步軍統領副都統等毋庸自陳考選軍政時屬員註考照外省舉劾例各省駐防將軍副都統等照提鎮例自陳屬員照京城例德州等處城守尉協領派大臣往考會同察覈其屬註考以聞雍正元年命平等官守備以上督撫提鎮註考其冬詔曰初次考選軍政有出兵効力年老俸深尙能坐理者留任不宜留任者另奏加恩或雖未効力行間而供職年久者亦留心驗看此則垂念資勞特頒寬典非常例也二年諭各省所保副參游擊輪流引見察其人材弓馬督撫提鎮以其操守訓練分別等第密陳六年山西太原總兵官袁立松疏陳平垣營守備梁玉廉潔敏練以年老入參劾帝以諳練才不可多得命酌量以遊擊題補尤殊恩也是年定卓異官原任內有貪酷不法或陞調他省別犯贓罪原舉長官分別處分乾隆二年部議出兵効力人員年老休致令子弟一人入伍食糈無子弟

亦給守糧發贍從之時直省保題員弁類以明白勤敏才堪辦事列上選十一年諭嗣後保題務重弓馬漢仗十五年以各省所保總兵官詳當意諭曰年滿千總一項類多猥瑣國家擢用武職營伍爲正途拔補將弁必選之若輩緣次而升皆自年滿千總始折衝禦侮之用豫籌於昇平無事之日不可視爲緩圖二十四年以大臣自陳例旣罷敕兵部於軍政年將在京都統副都統在外駐防將軍都統副都統各省提督總兵官分別三本條舉事實候鑒裁以重考績四十二年定衛所綠營武職薦舉卓異尙未陞轉再遇軍政列平等者將上次卓異註銷嘉慶四年定侍衛軍政考試向例軍政年不許告病乞休以杜規避八年申諭查閱營伍年分事關考覈照軍政例不得告病乞休咸同軍興百度稍弛軍政大典相沿不廢咸豐二年黑龍江將軍英隆以俄兵窺伺派將弁扼守要隘疏請本年軍政展限舉行不允嗣湖廣總督程添采等以軍務未竣疏請展限令凱撤後再行補考並諭年老力衰者隨時參辦沿及德宗雖加意振飭勢成弩末展限之舉史不絕書光緒十四年編定北洋海軍由海軍衙門司

黜陟甲午以後力參覆轍裁綠營練新軍別訂考覈章程三十二年改兵部爲陸軍部其考覈隸軍銜司宣統二年設海軍部其考覈隸軍制司朝廷銳意革新軍紀宜可少振無如積習已深時艱日棘卒歸罔濟云

選舉七

捐納

清制入官重正途自捐例開官吏乃以資進其始固以蒐羅異途人才補科目所不及中葉而後名器不尊登進乃濫仕途因之役雜矣捐例不外拯荒河工軍需三者曰暫行事例期滿或事竣卽停而現行事例否捐途文職小京官至郎中未入流至道員武職千把總至參將而職官並得捐陞改捐降捐捐選補各項班次分發指省翎銜封典加級紀錄此外降革留任離任原銜原資原翎得捐復坐補原缺試俸歷俸實授保舉試用離任引見投供驗看迴避得捐免平民得捐貢監封典職銜大抵貢監銜封加級紀錄無關銜政者屬現行事例餘風暫行事例歷代捐例時有變更惟捐納官不得分吏禮部道府非由曾任實缺正印官捐納僅授簡缺則著爲合銓補則新捐班次視舊班爲優此通例也捐事戶部捐納房主之收捐或由外省或由部庫或省部均得報捐咸豐後

並由京銅局凡報捐者曰官生部予以據曰執照貢監並給國子監照俊秀納貢監或職銜貢監納職銜由原籍地方官查具身家清白冊季報或歲報納職官者查明有無違礙取具族鄰甘結依限造報逾限或查報不實罪之其大略也文官捐始康熙十三年以用兵三藩軍需孔亟暫開事例十六年左都御史宋德宜言開例三載知縣捐至五百餘人始因缺多易得踴躍爭趨今見非數年不克選授徘徊觀望宜限期停止俾輸捐恐後既有濟軍需亦慎重名器帝納其言滇南收復捐例停嗣以西安大同饑又永定河工復開事例五十一年增置通州倉廩科臣有請開捐者廷議如所請侍郎王掾抗疏言鄉里童騷一旦捐資儼然民上或分一縣之符或擁一道之節不惟濫傷名器抑且爲累地方宜禁止以塞僥倖之路杜言利之門帝聽之爲飭九卿再議青海用兵價餉不繼內大臣議停各途守選及遷補專用捐資助餉者刑部尙書張廷樞言惟捐納所分員缺可避軍餉人正途及遷補者宜仍舊從之雍正二年開阿爾台運米事例五年直隸水災議興營田從大學士朱軾請開營田事例雲貴總督

鄂爾泰以滇黔墾荒經費無著請開捐如營田例帝曰墾田事例於地方有裨益向因各捐例人多難於銓選降旨停止年來捐納應用之人將次用完越數年必致無捐納之人而專用科目矣應酌添捐納事款除道府同知不許捐納其通判知州知縣及州同縣丞等酌議准捐下九卿議行十二年開豫籌糧運例先是俊秀准貢得輸資爲教職已慮異途人員不勝訓迪表率之責康熙三十三年令俊秀准貢指學正教諭者改縣丞訓導改主簿雍正元年諭捐納教職多不通文理少年以之爲學問優長年高齒長者之師可乎詔改用如前例高宗初元詔停京外捐例乾隆七年上下江水災命刑部侍郎周學健直督高斌往同督撫辦理籌合疏言賑務水利需費浩繁請仿樂善好施例出資効力者量多寡叙職官詔以京官中行評博以下外官同知通判以下無礙正途如所請行嗣是上下江直隸山東河南屢告災輒徇臣工請許開捐例十三年進勦大金川四川巡撫紀山奏行運米事例部議運米石抵捐銀二十五兩納官以是爲差川陝總督張廣泗言軍前口糧領折色石發銀五六兩事例既開各

員以存米納捐計貢監納卽用同知不過千餘金卽用小京官不過數百金請令如數交銀以杜弊端報可三十九年再征金川復開川運例惟四庫館牒錄議叙等職多靳不令捐納餘得一體報捐貢監納道府例自雍正五年後數十年無行者至是復行五十八年詔曰前因軍需河工支用浩繁暫開事例原屬一時權宜迄今二十餘年府庫充盈並不因停捐稍形支絀可見捐例竟當不必舉行不特慎重名器亦以嘉惠士林我子孫當永以爲法倘有以開捐請者卽爲言利之臣當斥而勿用嘉慶三年從戶部侍郎蔣賜葵請開川楚善後事例帝慮正途因之壅滯飭妥議條欵尋議京官郎中員外郎外官道府有理事親民之責未便濫予登進進士舉人恩拔副優歲貢始許捐納非正途候補候選正印人員亦得遞捐現任應補候選小京官佐貳止准以應陞之項捐納從之嗣以河屢決續開衡工豫東武陟等例十一年定捐納道府保曾任知府同知直隸州知州並州縣正印等官加捐及現任京職堪勝繁缺者許以繁簡各缺選用其貢監初捐及現任京職僅堪簡缺並外任佐雜等官遞捐者專以簡

缺選用宣宗文宗御極之初首停捐例一時以爲美談自道光七年開酌增常例而籌備經費豫工遵捐順天兩廣及三省新捐次第議行其時捐例多沿舊制惟於推廣捐例中准貢生捐中書豫工例中准增附捐教職而已咸豐元年以給事中汪元方言罷增附捐教職其已選補者不許濫膺保薦是年特開籌餉事例明年續頒寬籌軍餉章程九年復推廣捐例時軍興餉絀捐例繁多無復限制仕途蕪雜日益甚同治元年御史裘德俊請令商賈不得納正印實官以虛銜雜職爲限下部議行尋部臣言捐生觀望有礙餉需詔仍舊制四年山東巡撫閻敬銘言各省捐輸減成按之籌餉定例不及十成之三彼輩以官爲貿易略一侵吞錢糧已逾原捐之數明效輸將暗虧帑項請將道府州縣照籌餉例減二成專於京銅局報捐從之時內則京捐局外則甘捐皖捐黔捐設局徧各行省侵蝕勒派私行減折諸弊並作光緒初議者謂乾隆間常例每歲貢監封典雜賦指收約三百萬今指例折減歲入轉不及百五十萬名器重雖虛銜亦覺其榮多費而有所不惜名器輕則實職不難驟獲減數而未必樂輸所

得無幾所傷實多停捐爲便時復有言捐官宜考試花翎及在任候選等捐宜停者輒下部議五年帝以捐例無補餉需實傷吏道明詔停止未幾海疆多故十年開海防捐如籌餉例減二成核收常例指數並核減是時臺灣甫開實官捐他如四川按糧津貼捐順天直隸河南浙江安徽湖北各賑捐戶部廣東軍火捐福建洋藥茶捐雲南米捐自海防例行惟川捐如舊餘或併或罷十三年河南武陟鄭州沁黃兩河漫決御史周天霖李士銀先後請開鄭工例以濟要工部議停海防捐開鄭工捐十五年籌辦海軍復罷鄭工開海防新捐新捐屢展限行之十餘年二十六年開江甯籌餉秦晉實官捐順直善後賑捐次第舉辦江甯順直捐視新海防例秦晉捐但獎五品以下實官庚子變後帝銳意圖治言者多謂捐納非善政詔卽停止然報効叙官舊捐移獎且繼續行之但有停捐之名而已武職捐雍正初惟納千把總乾隆九年直賑捐有納衛守備者三十九年川運例參遊都守始得遞捐但武生監生捐止都司嘉慶三年川楚善後例武營捐納略如川運同治五年閩浙總督左宗棠言閩省武營捐班

太多應嚴加區別以肅軍政並請罷武職捐從之光緒二十一年新海防例展
限議增武職捐於揀發外別立一班俾捐輸踴躍三十一年兵部奏開捐十年
入款僅十餘萬無裨國帑有碍營伍請將實官虛銜捐復翎銜封典一切停罷
報可捐例初開慮其弊也嘗設爲限制往往不然而其法壞康熙十八年定捐
納官到任三年稱職者具題陞轉不稱職者題叅然疆吏罕有以不職上聞者
已令道府以下捐銀者免具題照常陞轉左都御史徐元文言國家大體所關
惟賢不肖之辨三年具題所以使賢者勸不肖者懼輸銀免具題是金多者與
稱職同科此曹以現任之官營輸入之計何所不至急宜停止順治間准貢例
監出身官不得陞補正印康熙六年定爲保舉之法各途出身官經該堂官及
督撫保舉稱職者陞京官及正印無保舉者陞佐貳雜職三十年大軍征噶爾
丹戶部奏行輸送草豆例准異途人員捐免保舉御史陸隴其言捐納一事不
得已而暫開許捐免保舉則與正途無異且督撫保舉之人必清廉方爲合例
保舉可捐免是清廉可納資得也又言督撫於捐納人員有遲至數年不保舉

亦不糾劾乞敕部通稽捐納官到任三年無保舉者開缺休致疏下九卿議捐免保舉無礙正途若三年無保舉卽休致則營求保舉益甚應毋庸議隴其持之益堅廷議隴其不計緩急輕重浮詞粉飾致捐生觀望遲誤軍機擬奪職帝特宥之自是吏員例監出身者欲陞補或捐納京外正印官必先捐免保舉惟准貢獨否初納歲貢者同正途故捐免保舉例開貢監雖同一捐納而軒輊殊甚乾隆二十六年部議御史王啓緒奏豫工例內捐貢納京外正印官捐免保舉如例監例先納官者補行捐免不願者以佐貳改補成例爲一變矣漢軍捐納官非經考試不得銓選如漢官保舉例康熙間並准捐免六十一年帝以捐納部員補主事未久卽陞員郎外官道府亦然飭議試俸之法尋議郎中道府以下小京官佐雜以上於現任內試俸三年題咨實授方許陞轉從之乾隆間試俸復得捐免四十一年戶部奏請保舉考試試俸捐免例列入常捐限制之法至是悉弛官吏緣事罷謫降革留任非數年無過不得開復康熙間大同賑饑部議京察大計罷黜者悉予捐復徐元文言不可議遂寢三十三年河道

總督于成龍以運兩河工費繁鉅請仿陝西賑饑例開捐革職年老患疾休
致人員得捐復官而說指納稱貸者多非朘削無以償通負事不可行尙書薩
穆哈等詳成龍性私妄奏擬議職得旨從寬留任乾隆九年直賑捐部議指復
職款京察大員及交私罪者降調人員無論是否因公及比照六法條例武職
軍政糾劾及貪婪者不准指復因公罪誤無餘罪悉得指復三十五年帝念降
革留任人員因公案分輒停陞轉詔許指復三十九年川運例增進士舉人指
復原資例四十八年元革職降調官分段承修南運河工程指復例嘉慶三年
川憲善俊推廣其例以常指不准指復人員酌核情節得酌加報指奉旨降革
除灑六法外因委情誼高輕人員得加倍指復大計劾叅有疾休致調治就痊
及特旨降革留任人員復人員加十分之五指復十年部臣疏請於常例指
復外增文武大員指復原職留任例帝曰大員身罪吏議應罷斥經改革職留
任開復有一定年限若原職留任即可指復此例一開毫無畏忌有資者脫然
爲無忌之人無資者日久不能開復殊失政體不允行咸豐二年王大臣等議

直隸軍機處降革不准指復人員除實犯贓私外餘准加倍半指復降革一二品文武官向不在指復之列者許指復原官頂帶允行但飭一二品大員指復原銜須請旨嗣後推廣文職京察大計六法武職軍政被劾無奸贓情罪亦許指復原銜終清世雖行不復更也指納官或非指納官於本班上輪資若干俾班次較優銜補加速謂之花樣康熙十三年知縣得納先用卽用班工部侍郎田六善極言其弊謂宜停止三十三年戶部議行輸送草豆例臺臣請增應陞先用指御史陸機言前此有納先用一例正途爲之壅滯皇上灼見其弊久經停止納先用者大都奔競躁進多一先用之人卽多一害民之人不待辨而知其不可乾隆年事例屢開惟雙月單月不論雙月選用及雙月先用不論雙單月卽用等尋常班次蓋是時正途銓補未病雍滯無庸加指花樣納資者亦至是而止七年部議鼓勵江省賑臣各班選用特優道光年增插班間選抽班間選遇缺遇缺前等名目咸豐元年省遇缺遇缺前而增分缺先本班儘先三年復增分缺間不積班九年先後奏設新班遇缺新班儘先分缺先前分缺間前

本班儘先前不論班儘遇缺選補等班推廣捐例又有保舉捐入候補班候補捐本班先用例花樣繁多至斯已極自籌餉例開既多立班次以廣捐輸復減折捐例以期踴躍時納捐率以餉票成數或不及定額之半同治三年另訂加成新章於是有銀捐新班儘先遇缺等項輸銀不遇六成有奇而選用之優他途莫及八年吏部以銀班遇缺占缺太多擬改分班輪用刪不積班於新班遇缺上別設十成實銀一班曰新班遇缺先是謂大八成花樣雜時分缺先前分缺間前本班儘先前新班遇缺新班遇缺先統曰銀捐而新班遇缺先最稱優異新班遇缺次之序補五缺一週先用新班遇缺先三人然後新班遇缺及各項輪補班各得其一光緒二年江蘇巡撫吳元炳言新班遇缺先新班遇缺等班序補過速有見缺指捐之弊請停捐免試用例以救其失格於部議四年實官及各項花樣一律停捐七年御史葉蔭昉復言近年大八成各項銀捐班次無論選補得缺最易統歷正途勞績各班今捐例已停請改訂章程銀捐人員祇列捐班之前疏下部議然積重難返進士仰用知縣非加捐花樣則補缺甚

雖他無論已十年臺灣海防相繼例開三班分先分間儘先復得一體報捐而知縣並增海防新班十三年郊工新例增遇缺先班捐例等大八成班次亦相埒海防新例因之至二十七年各項花樣隨實官捐並停初捐納官但歸部選乾隆間爲疏通選途許加指分發二十六年豫工例京職郎中以下得指分各部院外官道府以下得指分各省三十九年川運例知州同知通判指分發如舊知縣有碍正途補用斬不與四十年兵部侍郎高樸言捐班知縣不許分發恐有碍舉班查壬辰科會試後揀選分發已閱四年湖北福建均因差委乏人奏請揀選可見舉班漸已補完請變通事例川運指不論雙單月卽用者許一體報指分發部議如所奏行惟大省分發不得逾十二人中小省不得逾十人小省不得逾八人雲貴兩省需員解送銅鉛雲南得分發二十人貴州如大省額從之是年兵部奏請候補候選衛守備衛千總如文職例加指分發隨清學習明年浙江巡撫三寶奏請教職指不論雙單月卽用者設加指分發到省委用均報可川運例停分發歸入常例報指爲永例四十二年以山東布政使陸燿

言東省分發佐雜漸多停布政司經歷理問州同以下佐雜官分發例四十六
年候補布政司經歷鄭肇芳等候選州同張衍齡等具呈戶部以投供日久部
選無期各省佐雜班已疏通請准報指分發爲奏行如舊例嘉慶四年給事中
廣興請將俊秀附生報指道府州縣者停銓實缺准加指分發責成督撫試看
三年酌量題補帝以停選示人失信令加指分發有礙政體不允行道咸間增
加指指省例光緒四年指例停而分發指省以常例得報指如故五年御史孔
憲毅以指省分發流弊不可勝言請罷之格部議不果行八年復申前請部覆
如議未幾海防例開仍准報指時分發人員擁擠殊甚疆吏輒奏停分發期滿
復請展限各直省比比然也定例指納官分發各部院學習三年外省試用一
年期滿各堂官督撫實行甄別奏留乃得補官嘉慶十六年諭指納員籤分部
院學習行走年滿當詳加甄別近來該堂官於行走報滿人員無不保留市恩
邀譽不顧登進之濫可爲寒心道光八年諭酌增常例報指分發人員爲數更
多著各督撫鹽政留心察看不必拘定年限認真甄覈然奉行日久長官循例

奏留徒有甄別之名不盡遵上指也咸豐七年從御史何兆瀛請詔各部院考試捐納司員察其能否辦理案牘尋兵部試以論題御史朱文江以爲言詔切責之命嗣後毋得以考試虛文徒飾觀聽外官分發到省例由督撫考試分別等第黜陟有差光緒初各省遵例考試顧雲南有咨回降調者五年詔各省考試捐納人員府廳州縣試論一佐雜試告示判語八年閩浙總督何璟言閩省應試府廳州縣百五十四員鹽大使五十五員佐雜五百九十六員知府直隸州知縣鹽大使取留十之五同通佐雜留十之四報聞三十三年憲政編查館議覆御史趙炳麟疏捐納道府同通州縣佐雜未到省者入吏部學治館肄業半年已到省入法政學堂肄業長期三年速成一年有半尋議上考驗外官章程各省遵章考試間亦罷黜數人以應明詔而於澄清吏治之道無補也貢監捐清初已行監捐沿明納粟例順治十二年開廩生捐銀准貢例從御史楊義請也十七年禮部以亢旱日久請暫開准貢令士民納銀賑濟允之貢監例得考職康熙六年御史李棠言進士舉人遲至十年始得一官今例監考補中書

三年後卽陞部屬應停罷部覆如議自是貢監考職祇以州同州判縣丞主簿吏目用初考職例行各省監生或憚遠道跋涉或因文理不通多倩代頂冒者世宗深知其弊特遣大臣司考試五年令與考者千一百餘人悉引見時以頂冒避匿者九百餘人帝於引見員中揀選七十餘人授內外官有差乾隆元年停考職三年令捐納貢監如歲貢例分別等第以主簿吏目考取捐監未滿三年者不與道光後考職例罷雍正間帝以積貯宜裕允廣東江浙湖廣以本色納監乾隆元年罷一切捐例廷議捐監爲士子應試之階請於戶部收捐備各省賑濟從之三年詔復行常平捐監例各省得一體納本色原定各省捐穀三千餘萬石數年僅得二百五十餘萬石復令戶部兼收折色十年湖廣總督鄂彌達言捐監事例穀不如銀銀有定數穀無成價易捐穀爲捐銀倘遇荒歉亦可動支採買允行大學士等復言各省納本色有名無實論停止專由部收折色得旨各省收捐不必停在部指折色者聽三十一年以陝甘監捐積弊最甚詔停罷尋並罷安徽直隸山西河南湖南湖北惟雲南福建廣東收本色如舊三

十九年陝西巡撫畢沅陝甘總督勒爾謹請如例收納監糧允之是年甘省奏報六個月內捐監萬九千十七名監糧八十餘萬石帝疑之布政使王賈望主其事私收折色減成包辦更虛報賑災侵冒鉅款繼任布政使王廷贊知其弊不能革事覺置賈望勒爾謹廷贊於法官吏緣是罷黜者數十人報捐監生或加捐職官者分別停科罰俸停選其後監捐無復納粟遺意矣貢捐屬常例向於部庫報捐嘉慶間疆吏屢以爲請輒阻部議十二年部臣言庫帑充裕請變通常例各省一體收捐報可此外尙有捐馬百匹予紀錄連丁三年多交米三百石給頂帶之例其樂善好施例內凡捐資修葺文廟城垣書院義學考棚義倉橋梁道路或捐輸穀米銀兩分別議叙頂帶職銜加級紀錄有差餘如各省鹽商士紳捐輸鉅款酌予獎叙皆出自急公好義與捐納相似而實不同也

清史稿

志

選舉八

新選舉

新選舉制別於歷代取士官人之法清季豫備憲政倣各國代議制度選舉議員博採輿論議員選舉有二曰資政院議員選舉曰各省諮議局議員選舉自辛丑回鑾朝廷銳意求治派大臣赴各國考察政治設考察政治館命甄擇各國政法斟酌損益候旨裁定光緒三十二年七月詔曰考察政治大臣載澤等回國陳奏國勢不振由於上下相睽內外隔闕而各國所以富強在實行憲法取決公論今日惟有仿行憲政大權統於朝廷庶政公諸輿論廓清積弊明定責成以豫備立憲基礎俟規模初具妥議立憲實行期限各省將軍督撫曉諭士庶人等各明忠君愛國之義合羣進化之理尊崇秩序保守和平豫備立憲國民之資格九月慶親王奕劻等遵旨核議釐定官制以立憲國官制立法行政司法三權並峙各有專屬相輔而行立法當屬議院今日尙難實行請暫設

資政院以爲豫備詔如所議三十三年改考察政治館爲憲政編查館八月諭曰立憲政體取決公論中國上下議院未能成立亟宜設資政院以立議院基礎派溥倫孫家鼐爲資政院總裁妥擬院章請旨施行尋諭各省應有採取輿論之所俾指陳通省利病籌計地方治安並爲資政院儲才之階各省督撫於省會速設諮議局慎選公正明達官紳創辦其事由各屬合格紳民公舉賢能爲議員斷不可使品行悖謬營私武斷之人濫廁其間凡地方應興應革事宜議員公同集議候本省大吏裁奪施行將來資政院選舉議員由該局公推遞升三十四年六月資政院奏言立憲國之有議院所以代表民情議員多由人民公舉凡立法及豫算決算必經議院協贊方足啓國人信服之心大學云民之所好好之民之所惡惡之孟子云所欲與衆所惡勿施又云樂以天下憂以天下皆此理也昔先哲王致萬民於外朝而詢國危國遷實開各國議院之先聲日本豫備立憲於明治四年設左右院七年開地方會議八年立元老院二十三年遂頒憲法而開國會所以籌立議院之基者至詳且備謹旁考各國成

規揆以中國情勢酌擬院章目次凡十章先擬就總綱選舉二章呈覽報可是
月憲政編查館會同資政院擬訂各省諮議局章程並議員選舉章程奏言立
憲政體之要義在予人民以與聞政事權之而使爲行政官吏之監察東西立
憲各國雖國體不同法制各異無不設立議院使人民選舉議員代表輿論是
以上下之情通睽隔之弊少中國向無議院之說今議倡設人多視爲創舉不
知虞廷之明目達聰大禹之建輶設鐸洪範之謀及庶人周官之詢於外朝古
昔盛時無不廣採輿論以爲行政之準則特未有議院之制度耳今將創設議
院若不嚴定規則事爲之制曲爲之防流弊不可勝言中國地大民衆分省而
治各省之政主於督撫與各國地方之治直接國都者不同而郡縣之制異於
封建督撫事事受命於朝廷亦與各國聯邦之各爲法制者不同諮議局爲地
方自治與中央集權之樞紐必使下足哀集一省之輿論上仍無妨國家統一
之大權此日各省諮議局辦法必須與異日京師議院辦法有相成而無相悖
謹仰體聖訓博考各國立法之意兼採外省所擬章程參伍折衷擬訂各省諮

議局章程別爲選舉章程一百十五條候欽定頒行詔飭各督撫迅速舉辦實力奉行限一年內一律辦齊並諭曰朝廷軫念民依使國民與聞政事先於各省設諮議局以資歷練凡我士庶當共體時艱同據忠愛於地方應興應革之利弊切實指陳於國民應盡之義務應循之秩序竭誠踐守各督撫當本集思廣益之懷行好惡同民之政虛衷審察惟善是從至選舉議員尤宜督率有司認真監督精擇慎選憲政編查館資政院迅將君主立憲大綱暨議院選舉各法擇要編輯並將議院未開以前應籌備各事分期擬議具奏俟親裁後卽將開設議院年限欽定宣布八月憲政編查館資政院會奏遵擬憲法議院選舉法綱要暨議院未開以前逐年籌備事宜自本年起分九年籌備其關於選舉議員者第一年各省籌辦諮議局第二年舉行諮議局選舉各省一律成立頒布資政院章程舉行資政院選舉第三年召集資政院議員舉行開院第九年始宣布憲法頒布議院法暨上下議院議員選舉法舉行上下議院議員選舉諭令京外各衙門依限舉辦先是資政院奏擬院章目次第二章爲選舉宣統

元年七月資政院奏續擬院章改訂第二章目次爲議員專詳議員資格額數分類任期而另定選舉詳細章程以免混淆從之院章規定資政院議員資格由下列各項人員年滿三十歲以上者選充一宗室王公世爵二滿漢世爵三外藩王公世爵四宗室覺羅五各部院四品以下七品以上官惟審判檢察巡警官不與六碩學通儒七納稅多額人八各省諮議局議員定額宗室王公世爵十六人滿漢世爵十二人外藩王公世爵十四人宗室覺羅六人各部院官三十二人碩學通儒十人納稅多額者十人各省諮議局議員一百人類別爲欽選互選宗室王公世爵滿漢世爵外藩王公世爵宗室覺羅各部院官碩學通儒納稅多額者欽選各省諮議局議員互選任期三年任滿一律改選九月資政院會奏資政院議員選舉章程疏言資政院議員選任之法大別爲欽選互選二者各有取義而欽選議員名位有崇卑人數有多寡當因宜定制取便推行宗室王公世爵滿漢世爵及外藩王公世爵階級既高計數較少應開列全單恭候簡命宗室覺羅各部院官及納稅多額者合格人數與議員定額比

例多少懸殊考外國上院制勅任議員多經互選擬略師其意於欽選之前舉行互選各照定額增列多名好惡既卜諸輿情用舍仍歸於宸斷其碩學通儒資格確定較難人數調查不易互選勢所難行擬略仿從前保薦鴻博之例寬取嚴用以蒐訪之任寄諸庶官扶擇之權授諸學部仍寬定開列名數莫不失欽選之本旨以上各項略採各國上院辦法爲建設上議院之基礎而資政院兼有下院性質不能無民選議員與欽選相對待特以諮議局爲資政院半數議員之互選機關諮議局議員本由各省合格紳民複選而來則諮議局公推遞升之資政院議員卽不啻人民間接所選舉公推遞升之標準不能不以得票多寡爲衡但監督權屬於督撫非輕覆定不令遽膺是選既與欽選大權示有區別自與下院要義不相背馳詔如所議行資政院議員選舉章程之規定宗室王公世爵列爵凡十二一和碩親王二多羅郡王三多羅貝勒四固山貝子五奉恩鎮國公六奉恩輔國公七不入八分鎮國公八不入八分輔國公九鎮國將軍十輔國將軍十一奉國將軍十二奉恩將軍按院章定額分配自和

碩親王至奉恩輔國公十人自不入八分鎮國公至奉恩將軍六人滿漢世爵以滿洲蒙古漢軍旗員及漢員三等男以上之爵級爲限按定額分配三等侯以上八人一等伯至三等男四人外藩王公世爵凡下列蒙古回部西藏各府一汗二親王三郡王四貝勒五貝子六鎮國公七輔國公按定額分配內蒙古六盟盟各一人外蒙古四盟盟各一人科布多及新疆所屬蒙古各旗一人青海所屬蒙古各旗一人回部一人西藏一人凡各項世爵年滿三十歲以上未奉特旨停止差俸及因疾病或世故自請開去一切差使者均得選充資政院議員每屆選舉資政院於前一年九月行知宗人府各該管衙門理藩部分別查明合格者造具清冊於選舉年分二月以前咨送資政院由院分別開單於三月以前奏請按額欽選其宗室王公滿漢世爵現任軍機大臣參豫政務大臣及資政院總裁副總裁者無庸選充有缺額時資政院隨時行知各該衙門修正清冊按爵級或部落應選充者奏請欽選補足之宗室覺羅凡男子年滿三十歲以上無下列情事者得選充資政院議員一曾處圈禁或發遣者二失

財產上信用被人控實未清結者三吸食鴉片者四有心疾者五不識文義者其現任三品以上職官審判檢察巡警官及現充海陸軍軍人者無庸選充按定額分配宗室四人覺羅二人由各該合格人先行互選於選舉年分二月初一日在京師及奉天府行之京師以宗人府堂官爲監督奉天以東三省總督爲監督每屆互選資政院於前一年九月行知互選監督照章舉行設互選管理員掌調查互選人管理投票開票檢票等事宜由互選管理員查明合格人員造具互選人名冊先期呈由互選監督宣示公衆如本人認爲錯誤遺漏得於宣示期內呈請互選監督更正補入經批駁者不得復請互選選舉人及被選舉人均以列名互選人名冊者爲限屆期互選監督親蒞投票所或派員監察之互選人應親赴投票所自行投票用記名單記法互選人有因職務或因疾病事故不能親赴投票者得就互選人內委託一人代行投票應由本人親書密封署名畫押連同委託憑證送致受託人該受託人應將密封及委託憑證臨時向互選監督呈驗方許代投以得票較多數者爲當選互選當選人

額數各以議員定額之十倍爲準互選告竣互選監督卽日將當選人名榜示投票所不願應選者得於三日內呈明互選監督撤銷將得票次多數者補入互選管理員造具當選人名冊連同票紙呈由互選監督咨送資政院由院將當選人名及得票數目於選舉年分三月以前奏請按額欽選有缺額時資政院隨時將本屆當選人開單奏請欽選補足之本屆當選人數不足議員缺額之三倍時應舉行臨時互選一切照尋常互選辦理各部院官以下列各官爲限一內閣侍讀學士以下中書以上二翰林院侍讀學士以下庶吉士以上三部左右參議以下七品小京官以上四掌印給事中給事中及監察御史各官以年滿三十歲以上具下列資格之一得選充資政院議員一現任實缺者二曾任實缺未休致革職者三奉特旨署理或奏署者四奉特旨候補用選用或學習行走者五其餘候補滿三年以上者由合格人先行互選於選舉年分二月初一日在京師行之以都察院堂官爲監督互選當選人額數以議員定額之五倍爲率各部院官選充資政院議員者於院內職權本衙門長官不

得干涉其因升轉降調致失原定資格者卽同時失資政院議員之資格所有
舉行互選奏請欽選補足缺額各辦法與宗室覺羅選舉同碩學通儒資格凡
四一不由考試特旨賞授清秩者二著書有裨政治或學術者三有入通儒院
之資格者四充高等及專門學堂主要科目教習五年以上著有成績者凡年
滿三十歲以上具前列資格之一均得選充資政院議員每屆選舉資政院於
前一年九月行知學部由部通行京堂以上官翰林給事中御史各省督撫提
學司出使各國大臣各蒐訪一人或二人開具事實保送學部審查擇定合格
得保多者三十人作爲碩學通儒議員之被選人於選舉年分二月以前咨送
資政院由院將被選人姓名及原保人姓名官職開單於三月以前奏請按額
欽選有缺額時資政院隨時將本屆被選人照章奏請欽選補足之本屆被選
人數不足議員缺額之三倍時應另行保送納稅多額人以下列資格爲限一
男子照地方自治章程有選民權者二年納正稅或地方公益捐在所居省分
占額較多者凡具此資格年滿三十歲以上得選充資政院議員由合格人先

行互選於選舉年分二月初一日在各省城行之以布政使或民政使爲監督
每屆互選資政院於前一年九月行知各省督撫照章舉行互選監督會同商
務總會總理協理遴派互選管理員互選辦法與普通互選同互選人額數每
省以二十人爲限投票用記名連記法以得票過互選人數三分之一者爲當
選互選當選人額數以互選人額數十分之一爲率如當選人不足定額就得
票較多者令互選人再行投票以足額爲止其得票及格額滿見遺者作爲候
補當選人當選人不願應選得呈明互選監督撤銷以候補當選人依次遞補
互選管理員造具當選人及候補當選人名冊連同票紙呈由互選監督申送
本省督撫各督撫將當選人姓名及得票數目咨送資政院由院開單於三月
以前奏請按額欽選有缺額時資政院隨時將本屆當選人開單奏請欽選補
足之本屆當選人不足議員缺額之三倍時以候補當選人遞補候補當選人
數不敷時舉行臨時互選各省諮議局互選諮政院議員按定額分配奉天三
人吉林二人黑龍江二人順直九人江蘇七人安徽五人江西六人浙江七人

福建四人湖北五人湖南五人山東六人河南五人山西五人陝西四人甘肅三人新疆二人四川六人廣東五人廣西三人雲南四人貴州二人互選於選舉年分前一年十月十一日在各省諮議局行之以督撫爲監督每屆互選資政院於前一年九月行知各互選監督照章舉行屆期互選監督親莅監察之投票開票檢票等事由諮議局辦事處管理適用普通互選規則互選選舉人及被選舉人均以該省諮議局議員爲限投票用記名連記法以得票過互選人半數者爲當選互選當選人額數以各該省議員額數之二倍爲率如當選人不足定額就得票較多者令互選人再行投票以足額爲止其投票及格額滿見遺者作爲候補當選人諮議局辦事處造具當選人及候補當選人名冊連同票紙呈送互選監督覆加選定爲資政院議員不願應選者得呈明互選監督辭退依次將本屆當選人及候補當選人覆加選定補充不敷選充者舉行臨時互選選定後由互選監督造具名冊連同當選人及候補當選人原冊咨送資政院凡選充資政院議員者不得兼充本省諮議局議員有缺額時由

院行知該省督撫覆加選定補充或舉行臨時互選此資政院議員欽選互選辦法之概要也各省諮議局議員選舉章程之規定議員之選任用複選舉法複選之別於單選者單選逕由選舉人投票選出議員複選則先由選舉人選出若干選舉議員人更令選舉議員人投票選出議員是也諮議局議員定額因各省戶口尚無確實統計參酌各省取進學額及漕糧多寡以定準則奉天五十名吉林三十名黑龍江三十名順直百四十名江甯五十五名江蘇六十六名安徽八十三名江西九十七名浙江百十四名福建七十二名湖北八十八名湖南八十二名山東百名河南九十六名山西八十六名陝西六十三名甘肅四十三名新疆三十名四川百零五名廣東九十一名廣西五十七名雲南六十八名貴州三十九名京旗及各省駐防以所住地方爲本籍但旗制未改以前京旗得於順直議員定額外暫設專額十名各省駐防得於該省議員定額外每省暫設專額一名至三名選舉權之規定用限制選舉法凡屬本省籍貫之男子年滿二十五歲以上具下列資格之一者有選舉諮議局議員之權

一在本省地方辦理學務及公益事務滿三年以上著有成績者二在本國或外國中學堂及與中學同等或中學以上之學堂畢業者三有舉貢生員以上之出身者四曾任實缺職官文七品武五品以上未被參革者五在本省地方有五千元以上之營業資本或不動產者凡非本籍之男子年滿二十五歲寄居本省滿十年以上有萬元以上之營業資本或不動產者亦得有選舉權被選舉權之規定及其限制凡屬本省籍貫或寄居本省滿十年以上之男子年滿三十歲以上者得被選舉為諮議局議員凡有下列情事之一者不得有選舉權及被選舉權一品行悖謬營私武斷者二曾處監禁以上之刑者三營業不正者四失財產上信用被人控實未清結者五吸食鴉片者六有心疾者七身家不清白者八不誠文義者其有所處地位不適用於選舉議員及被選舉為議員者一本省官吏或幕友二軍人三巡警官吏四僧道及宗教師五學堂肄業生均停其選舉權及被選舉權其現充小學教員者停其被選舉權諮議局設議長一副議長二用單記投票法分次互選設常駐議員以議員額數十分

之二爲額用連記投票法一次互選凡議員三年一改選議長副議長任期同
常駐議員任期限一年議長因事出缺以副議長遞補副議長出缺由議員互
選充補議員出缺以複選候補當選人依次遞補議員改選再被選者得連任
以一次爲限議員非因下列事由不得辭職一確有疾病不能担任職務者二
確有職業不能常駐本省境內者三其餘事由經諮議局允許者凡選舉區域
初選舉以廳州縣爲選舉區複選舉以府直隸廳州爲選舉區直隸廳州及府
之本管地方均作爲初選區直隸廳無屬縣者以附近之府爲複選區初選區
廳以同知通判州縣以知州知縣爲初選監督複選區府以知府直隸廳州以
同知通判知州爲複選監督府直隸廳州作爲初選區者得遵派教佐員爲初
選監督初選複選均設投票開票管理員監察員若干名管理員不拘官紳監
察員以本地紳士爲限初選區選舉人名冊及當選人姓名票數由初選監督
申報複選監督複選當選人姓名票數由複選監督申報督撫分別咨報資政
院民政部立案選舉年限三年一次以正月十五日爲初選日期三月十五日

爲複選日期凡初選舉初選監督按地方廣狹人口多寡分割本管區域爲若干投票區分設選舉調查員按照選舉資格詳細調查將合格選舉人造具名冊於選舉期六個月以前呈由複選監督申報督撫並宣示公衆如本人認爲錯誤遺漏得於宣示期內呈請初選監督更正初選當選人額數按照議員定額加多十倍各初選區應出當選人若干名由複選監督分配投票用無名單記法其有寫不依式者夾寫他事者字跡模糊者不用頒發票紙者選出之人不合被選資格者作爲廢票以本區應出當選人額數除選舉人總數所得半數爲當選票額得票不滿當選票額以上者不得爲初選當選人複選由初選當選人齊集複選監督所在地行之複選當選人卽爲諮議局議員各複選區應得議員若干名由督撫按全省議員定額分配投票當選一切與初選同關於選舉之變更如選舉人名冊有舞弊作偽情事或辦理不遵定章被控判定確實者初選複選均無效當選議員有辭任或疾病不能應選或身故或被選資格不符當選票數不實被控判定確實者其當選無效各以候補當選人遞

補如選舉人確認辦理人員不遵定章有舞弊作偽證據或當選人被選資格不符當選票數不實及落員人確信得票可當選而不與選候補當選人名次錯誤遺漏者均得向該管衙門呈控限自選舉日起三十日凡選舉訴訟初選向府直隸廳州衙門複選向按察使衙門呈控各省已設審判廳者分別向地方高等審判呈控廳不服判定者初選得向按察使衙門複選得向大理院上控限判定日起三個月已設審判廳者照審判廳上控章程辦理選舉人及辦理選舉人選舉關係人有違法行爲分別輕重處以監禁罰金有差二年以上十年以下不得爲選舉人及被選舉人專額議員選舉人及被選舉人以京旗及駐防人員爲限選舉及被選舉資格與諮議局普通議員資格同各省駐防專額議員之數視該省駐防取進學額全數在十名亦內者設議員一名二十名以內設二名二十名以外設三名初選當選人額數以議員定額十倍之數爲準複選當選人額數以議員定額爲準調查選舉人名冊由督撫會同將軍都統於京旗及駐防人員內各酌派選舉調查員當選改選補選及訴訟罰則

各事均照諮議局選舉章程辦理此各省諮議局議員初選複選辦法之概略也各省諮議局選舉宣統元年各督撫次第奏報舉行於九月初一日召集開會舉行互選資政諮議員二年四月資政院奏請欽選各項議員奉敕選定以八月二十日爲召集期九月初一日資政院舉行第一次開院禮監國攝政王代行蒞選頒諭嘉勉議員三年九月遵章第二次召集開會資政院諮議局議員選舉外尚有地方自治團體之選舉地方自治爲立憲基礎列於籌備事宜清單光緒三十四年宣統元年憲政編查館先後核議民政部奏城鎮鄉府廳州縣及京師地方自治暨選舉各章程各省次第籌辦其選舉辦法與諮議局議員選舉略有出入以繁瑣不備載

清史稿

職官志序

太祖肇基東土國俗淳壹事簡職專置八旗總管大臣佐管大臣董統軍旅置議政五大臣理事十大臣釐治政刑任用者止親貴數臣官稱職立人稱官置興也勃焉太宗厲精爲治設三館置八承政論功料動翕斯邦治世祖入關因明遺制內自閣部以迄庶司損益有物藩部勦建名竝七卿外臺督撫杜其紛更著爲令甲綠營提鎮以下悉易差遣爲官旗營御前領衛年宿位重意任隆密都統旗長軍民合治職視專圻駐防分翰外畿規撫京制西北邊陲守以重臣綏靖蒙番方軌都護斯皆因俗而治得其宜已世宗綜覈罷尙寶行人僉都諸目高宗明哲損參政參議副使僉事諸銜沙汰虛冗奉職肅然嘉道以降整釐如舊日久積弛精意浸失日革月易百職相侵光緒變法宣統議制品目張皇掌寄紛雜將以靖國不益醫乎夫一國事權操自樞垣匯於六曹分寄於臺吏自改內三院爲內閣台輔拱袂迨軍機設題本廢內閣益類閑曹六部長官

數四各無專事甚或朝握銓衡夕兼支計甫主戎政復領容臺一職數官一官數職曲存稟仰建樹甯論時軍機之權獨峙於其上國家興大兵役特簡經略大臣參贊大臣親寄軍要吏部助之用人戶部協以巨饜用能藉此雄職奏厥膚功自是權復移於經略督撫儀品雖與相埒然不過承號令備策應而已厥後海疆衅起經略才望稍爽權力漸微粵難糾紛首相督師屢值厥事朝廷間用督撫董戎多不辱命猶復不制以文法故能需施魄力自是權又移於督撫同治中興光緒還都皆其力也洎乎末造親貴用事權削四旁厚集中央彊事遂致不支焉初制內外羣寮滿漢參用蒙古漢軍次第分布康雍兩朝西北督撫權定滿闕領隊辦事大臣專任滿員累朝膺闔外重寄者滿臣爲多逮文宗兼用漢人勲業遂著大抵中葉以前開疆拓宇功多成於滿人中葉以後撥劇整亂功多成於漢人季世釐定官制始未嘗不欲混齊畛域以固厥根本也而弊風相仍一物自爲鴻乙徒致疑駭雖危亡之政無關典要亦必輯而列之以著一時故實治亂之跡庶皎然若覽焉